

6

HARVARD COLLEGE LIBRARY  
FROM THE  
HARVARD-YENCHING  
INSTITUTE

SEP. 30 1929

7.

~~Ch L 5570.2928~~

T 5237.7/2928



明詩綜卷十二

小長蘆 朱彝尊

錄



武林 周 崧 緝評

鎠 炳 四首

炳字彥昂以字行鄱陽人明初獻書任中書典

籤出為大都督府掌記有春雨軒集楊廉夫云彥昂詩音節甚古琅

然漢魏之音 危太朴云彥昂馳騁戎馬決勝籌帷有古烈士風故其詩悲壯沉鬱 宋景濂云彥昂工力既深摹擬輒似詩如璞玉輝春蠟

珠浴月 蔣仲舒云彥昂詩篇峻潔尤多樂府清絕之氣可觀淒楚之調為甚既累簡質然亦非本語 彥昂洪武己未弔余廷心

墓文自稱大都督府掌記集載哀曹國公詩云三年忝記府龍鍾侍文墨又沐西平輓詩云十年參幕府慙媿簪纓客曹國公以洪武三年領

大都督府事西平以四年同知大都督府蓋彥昂初任中書典籤而後從事於都府也詩集危素宋濂序之以為兼謝康樂岑嘉州韋應物之

長而駸駸進於漢魏楊維禎則愛其詩兼諸體特為評點其推重之如此



靜志居詩話彛詩純效鐵厓宜鐵厓之傾倒也至其病過於蘇豔特擇其淡雅者著於編

崩城操

朝從城上哭長城與雲齊暮從城下哭長城化為泥嗚呼城崩兮猶可築夫君死乎百身莫贖

春夕直左掖懷周侍御

一作即

晚雨池上晴透迤澹將夕金莖華月生綺樹流雲濕窗虛漏聲永慢卷鑪煙襲憶我同袍人何繇共瑤席

楊廉夫云仿韋也

左掖門朝退呈吳待制

繆忝金閨籍聯班趨晚朝透迤西上門窈窕長安橋殘雪帶遠樹夕陽明山椒不有同袍者疇能慰寂寥

別京邑之東阿

前年別鄉閭今年出京邑悠悠去江漢杳杳事形役所懼心志違况此風波急烏啼楓樹煙鴈下蘆洲夕回首望長安蒼茫寸心失

郭奎 三十首

奎字子章以字行巢縣人明初朱文正開大都督府節鎮洪都太祖命奎輔佐參謀及文正得罪坐不諫誅有望雲集

王元美云參軍帥幕風流詞藻清麗究其品格在張徐之次 曹潔

躬云參軍詩以骨勝一洗元人穠麗之習

詩話參謀詩格清剛句無浮響頗近汪忠勤

長相思



長相思 小山下 薜蘿秋深 沒行路 王孫年年歸不去 江  
南水落 天色寒 鴻雁滄波連 日暮我思昔 子金珮環美  
人座上 如花顏 紫芝叢 桂紛兩間 下有流水清潺潺 吹  
笙鼓瑟 心常閒 別來歲久 鬢髮斑 青雲猿鶴 不可以企  
及 魂飛夢往 愁鄉關 長相思 何時還

烏夜啼

石頭城上烏 遙夜鳴 相呼紫清道士 有兩樹烏啼不離  
樹 高處千聲啞啞 復萬聲中 堂酒闌 夢未成 呼童把燭  
起 開戶照樹 惟恐鄰人驚 庭前再拜 向爾白 我家舊住  
長淮北 慈親已老 返哺違零 落猶為異鄉客 嚴霜滿地  
江月輝 東方未白 羣星稀 明朝日出 當早飛 莫使涕淚

霑裳衣

夜坐吟

江風蕭蕭吹古樹 關山蒼茫海生霧 北斗漸落明河微  
城頭烏啼天欲曙 客子不寐憂無衣 東征三年猶未歸  
蟋蟀在戶歲將暮 洞庭霜白芙蓉稀 男兒生當百戰死  
不執金吾即挾匕 閉門勿用長夜歌 騏驥終能致千里

擬古贈別

孟冬霜露降 悴彼荷與蒲 青青蘭蕙芳 采之將焉如 贈  
君夙昔意 聊以慰斯須 絃歌厲清響 置酒岐路隅 親戚  
念遠行 各言勉 良圖常恐不為樂 日月方其除 晨風奮  
高翼 北林多古榆 臨岐執子手 安得同車驅



擬古思友

鷓鴣鳴歲將宴蒹葭淒以霜思君隔山海道路悠且長睇  
彼參與辰清夜悲未央狂飈西北至一鴈方南翔言念  
疇昔懽與子同衣裳安知異寒暑日月不我將天高則  
有斗川涉愁無梁憂心隱如怒出戶徒徬徨

送江彥英還錢塘

東南有高樓華日照綺楹瓊筵列海錯雜以絃歌聲疏  
簾卷晨夕迴看蒼江清君今利收往我獨懷鹿鳴執事  
望長路駕言出東城嘉會常不足何況臨當行晴郊芳  
樹碧綠渚春蘭生持觴意難盡相思空復情

紀夢

忽忽頽芳年搖搖寄行役寢興勞形神鬢髮玄已白驚  
風響庭樹憂思日恒積夢魂清夜歸彷彿舊鄉邑青松  
在園田桑柘蔭廬室飛鳥雲際還牛羊下來夕澄湖澹  
微波秋山有佳色雞犬雜比鄰墟煙靄阡陌怡怡兄弟  
情淒淒丘隴側臨流濯長纓挂冠坐磐石似慰平生歡  
覺來異疇昔百年如轉蓬萬物乃遺鳥天命良在茲勿  
用云得失

寄陳教授敏

蘭葉欲覆階馨香襲芳室雨露之所滋惠風偃華質采  
采不盈筐薄言贈離析憂傷歲月愆同聲而異迹人生  
寄百年寒暑會有役歡樂難俱并浮名亦何益高誼諒



匪他可以比金石

送王彬叔往同安 二首

駕言出城門遙望西南路別離良在茲嘉會不常遇置  
酒張瓊筵綢繆復凝佇飲餞未崇朝聊以慰情素翩翩  
白羅裳皎皎瓊瑤樹高步凌青雲豈爲紅塵污春江及  
信潮芳舟襲蘭杜小人衆所疑君子誰不慕久欲同車  
行攀轅莫能去惜哉苦淹留年芳易遲暮顧盼懷殷勤  
增我越鄉慮

南州亂無家寇盜縱橫馳白骨蔽原野炎城與池千  
里何蕭條四顧令人悲倬哉皖公城當此江之濱崇墉  
上峩峩陣列紛魚麗明公秉高節德澤被華滋而蒙天

子恩慰爾長渴饑大田既多稼王師良有儀君子利收  
往樂土實在茲嘉賓復來集兼遂平生知春蘭麗芳渚  
鳴鳳翔高枝徘徊岐路側未忍言別離別離何以贈再  
詠東山詩

從軍詩

朝濟彭蠡湖暮止匡廬山軍行饑且疲露宿聊解鞍方  
秋黍稷華徂征西南端奄忽歲云晏雨雪淒以漫擊柝  
豈能寐哀哀想苦寒戰場久勞役裘褐俱不完鶴鳴在  
丘垤思婦應常歎誰無內顧懷受命誠獨難三苗阻聲  
教師出猶未還願公析天威戢舞羽與干上瞻太階平  
下覩斯民安勞旋訊杖杜貽爾室家懽



滕王閣

西南有高閣下瞰滄江清飛闥百餘尺複道周四楹白日一何麗照耀丹青明借問誰所爲云是滕王嬰壯哉大唐業封子臨斯城佩玉雜鳴鑿物換星亦更勝地罕常見賢者垂令名相公布文德復此嘉會并羣才若雲集頌以謳歌聲陽春不爲樂萬物爭光榮登高矚曠世臨流忘濯纓再拜述短辭柱石齊天傾

送孫良玉還同安

送君江上去山路雨初晴落日平淮樹春潮帶皖城酒因今日醉人是故鄉情莫說王孫怨芳洲綠樹生

歲暮

寒月出在戶江城鴈獨飛愁人不能寐鄉淚忽沾衣丘隴十年別星霜兩鬢稀爲言叢桂老歲暮憺忘歸

琴溪

吾慕琴高子於焉隱遁棲松雲生峭壁山雪漲迴溪古迹行人識新春好鳥啼學仙誠有道安得謝輪蹄

五嶺

侵晨登五嶺石磴畏躋攀急雪沾衣白因風點鬢斑雲連秦劔閣天塞漢蕭關想見當時路班超奉使還

出暖水向新營

山陽暖水地舊是北軍屯一澗雲連棧千峰雪照門奉書觀辟壘馳驛到邊藩爲卜歸人信今朝喜鵲喧



寄陳檢校

遙想紫薇省郎官直禁樓瓊花天上去清夜憶揚州二  
十四橋月玉簫吹兩頭秋風挂帆席幾度大梁游

中酒

春來中酒朝朝病擁被高眠嬾出門草沒漸迷湖上路  
花開未到郭西村湘娥有瑟催歸鴈楚客無書託故園  
惆悵東風醒亦醉夢中常是賦招魂

游三門山

黃茅蓋屋石爲門路轉溪迴更有村果樹連園收芋栗  
豆花滿地散雞豚雲深易就漁樵隱山遠全忘市井喧  
何獨武陵堪避世此中佳處亦難言

宿雨

宿雨瀟瀟悴客心高窗連日滯秋陰一枝未遂鷓鴣託  
四壁應愁蟋蟀吟家在淮南青桂老門臨湖水白蘋深  
鯉魚風熟香稻早釣艇誰撐近竹林

重憶西巖訪舊

鷓鴣聲中宿雨晴白雲閒倚馬頭生東鄰茅屋新煙起  
南澗石橋春水平野老見多還問姓山花開盡不知名  
故人宅近青松下未到柴門已出迎

寄劉彥基

二首

洪州別駕久相違驥足遲遲三月歸應被長干兒女笑  
春風不識繡羅衣



九月征人未授衣年年書到故園稀無情恨殺湘天鴈  
不帶平安一字飛

開歲卧病

多病文園渴未消自從人日遇花朝不知楊柳將春色  
綠到淮南第幾橋

贈陳教授敏

松樹連檐翠色多湖南春水澹生波貢家舊宅雲林在  
明月滿船聽櫂歌

贈白紵山菴道人楊玄中

四望亭前姑熟溪道人種玉住山西古松數株秋滿屋  
青鳥月明時一啼

德興山中

樹頭飛翠濕空濛茅屋雞鳴雪澗東好借吳興唐棣筆  
畫圖傳我是仙翁

銅陵寄劉知府

雙尊特爲故人將江路風濤忽渺茫坐對銅官不同飲  
馬蹄明日又涇陽

早發分宜縣

夜半荒雞鳴遠村板橋斜出縣西門征人衣上霜如雪  
猶未曾承國士恩

夏煜一首

煜字允中金陵人太祖下金陵辟爲行省博士



調浙東分省

劉辰國初事蹟云夏煜犯法取到湖廣投于江俞本記事錄云至正二十三年十二月夏

允中家人賤鹽敵境提至軍前置黃鶴樓下大浪中三日而死于考陶主敬集有洪武元年送夏允中總制浙東兼巡撫之詩允中讀宋太史潛溪集詩云景濂其字大夫爵宋以洪武二年六月總修元史始得階亞中大夫則洪武元二允中尚在安得云癸卯歲沉於楚江邪

哀孫炎

垂老戎馬間相知復何有幼與孫炎交於今俱白首炎也雅好詩落魄惟耽酒醉中有神助不放持杯手才豪不受羈焉肯事田畝精勤脫穎出盤錯迎刃剖浪迹帝王州結交英俠藪喈喈朝陽桐濯濯新春柳南北暗兵塵妖星下天狗我皇入金陵一見顏色厚高談天下計響若洪鐘叩即拜丞相掾奉身事明后再分太守符兼綰都官綬括蒼實重地豺虎白日吼皇曰汝孫炎其往

總制某再拜謝不敏寵命敢虛受一年風俗淳二年民物阜三年遠人歸上表請官守文章曹劉亞政事龔黃右舊歲過金華與炎適相偶寒燈夜半花春盤雪中韭終宴竟忘疲落月斜半占臨分各上馬攬轡復立久為言有小女離家方襁負今來已五周見父能認否未必到家期封書附姑舅置書篋笥間纔隔兩月後墨色尚未乾語音猶在口胡為內變生哭我平生友復恐是夢中仰天當戶牖斗柄昏建辰月魄夕在酉乃知真死矣慟哭吞聲喏復聞遇害時扞刀落雙肘奮怒髮衝冠大罵血漂白維時東南天彗出芒如帚淫淫苦雨愁擘擘驚電走魂子早歸來空山不可狃我過孰與規我病誰



云灸春酒釀薔薇奠子墳山培西京七葉貂零落成草  
莽既有千載名焉用百年壽我我馮公巖與子同不朽

熊鼎一首

鼎字伯穎臨川人吳元年徵授中書博士遷起  
居住出為浙江按察司僉事改山東副使拜晉  
王右傅除參軍授岐寧衛經歷召還至西涼為  
朶兒只把所害救葬之黃羊川

上巳日浴溫泉

驪山宮殿鎖溫泉天寶遺蹤故宛然繡谷春融丹井火  
金波月滿鑑池蓮玉顏承寵專恩澤翠輦來游惜暮年  
我亦逢時修禊事白頭空負麗人天

李應榮一首

應榮字顯道東陽人元末平江路教授同章溢  
謁太祖於軍門留參戎務以說降方國珍累官  
尚寶少卿

詩話實錄說降方國珍為主簿蔡元剛處士陳顯  
再使為夏煜陳顯而尚寶此作見東陽歷朝詩

奉使塗中作

驅車出東郭遠上天台城峰高插霄起屹立如迴屏前  
塗在雲杪彷彿秋蛇行俯視萬壑底澗水嘈嘈鳴恍然  
心目眩幾欲墮危崢况兼風雨至泥滑如飴錫一步三  
退縮戰慄若履冰僕夫屢顛躓行者難為情神武恢疆  
宇垂念及生靈俾將誠信辭以息東南兵藐焉一小子



敢不來趨承

劉駟一首

駟字宗道龍谿人洪武初倉攢以秀才徵試第  
一拜左都御史後坐事徙滇有愛禮先生集

詩話宗道講學遠師北溪其闢釋老甚嚴目佛為泥廝集中有同安歎  
云噫嘻吁紫陽之化衰家家阿彌儒也墨衣墨也墨衣滿城游遨誰我  
知不如歸也不如歸又游天蓋寺詩云若無  
僧寺塔直是一唐虞斯亦能言距楊墨者已

感興

浮屠日以興平地生棘刺大道為之荒聖門為之蔽嗟  
哉末俗流每每謂之是觀古聖賢人輦感多因爾蹇予  
魯且蒙奚為生此世發憤逐前修質弱安能至聖道雖  
云遠戮力應可致

丁麟一首

麟字彥祥海鹽人洪武乙丑進士除給事中改  
御史坐法死

詩話武原雙丁兄麟弟麟嘉禾二王兄鏞弟鈞詩雖格調卑然先民  
有作鄉曲後學不可不為表章也麟字彥禎官至濟南知府詩如烟寺  
行吟云得句便題林外竹脫巾長挂塔前松送人云西山日薄烏啼急  
南國風高雁影希天星湖云隄畔馬嘶芳草碧沙頭人上画船輕聞琴  
村云別鶴不聞雲外語野  
鳥時向屋頭鳴亦能拔俗

西湖竹枝詞

湧金門外春水多賣魚船子小于梭三三兩兩唱歌去  
驚起鴛鴦飛奈何

曹介一首

介字子直永嘉人洪武中監察御史



金碧山水圖

唐朝以來画金碧小李將軍稱絕奇流傳所見恨不廣  
真蹟往往人間稀此景何人之所作老眼按掌看宛若  
羣峰削翠撐晴霄一水流銀出丹壑初疑武陵溪桑麻  
夾岸花枝低漁郎昔日訪奇處回首但見蒼煙迷又疑  
天台山桃花流水非塵寰仙人劉阮采藥去虹橋一斷  
難躋攀我生胡為在塵市一見青山心獨喜拂衣便欲  
歸故鄉高卧溪堂看雲起觴我酒絃我琴高山流水誰  
知音

許伯旅一首

伯旅字廷慎黃巖人洪武中官刑科給事中有

介石橐

徐子元云廷慎若天台鴈宕雜踞東南小杜之名豈容多讓

詩話天台林公輔嘗述廷慎論作詩之法矣其辭曰法可言也法之意不可言也上士用法得法之意中士用法得法之似吾詩幾用法矣如是而起如是而終如是而為開闔如是而為抑揚頓挫如是而為輕重高下意之所至辭必與俱固未嘗囿乎法亦未嘗廢乎法也古之藝入若庖一輩隨其心手所出無他焉亦用其法爾由是而觀天下之術未有不用法而能神者也又論宋元二代之詩云人皆謂宋之文高於元元之詩高於宋殊不知宋之詩亦高於元也論詞語工麗音節瀏亮宋或不及於元至於說古今道事理輕重明白豈元諸公所能及宋哉其言具有深旨宜當時有小杜之目惜其集不傳惟餘赤城續志所載寥寥數篇而已

画馬

曹韓画馬久絕筆近代狀者多駑駘毫端不得千古意  
孰識世有真龍媒圖中此馬何所似人言昔產余吾水  
一聞高價傾千金更覺雄心少千里雙瞳爍電筋權奇  
索不可繫何言筭變化應隨霹靂去死生或與英雄期



涓人買骨吁可怪漢武勞師動橫潰豈知神物在人間  
驪黃迴出天機外我生愛馬癖莫醫眼見画圖神欲飛  
滎河真種當可致西坂弱水扶桑歸

吳去疾 一首

去疾字去疾安慶人給事中

詩話去疾

集不載其官闕考實錄吳元年十月帝御戟門與給事中吳去疾等論政務又嘗為議律官

春日雨中示友人

二月已過三月臨茅堂寂寥長晝陰梅花白白落已盡  
楊柳青青渾未深何日新晴出山郭及時行樂稱春心  
應須載酒窮幽賞爛醉扶肩過竹林

陶 誼 一首

誼字漢生天台人官員外郎

山居

煙蘿寂寂蔭柴扉路入蒼苔一徑微江燕定巢來自熟  
巖花結子落還稀修琴有制先鈔譜沽酒無錢更典衣  
采藥山童終日去夜深常與鶴同歸

張 適 十首

適字子宜長洲人洪武初以秀才舉擢工部都  
水郎中以病免後復舉明經授廣西理問歷滇  
池魚課宣課二司大使卒于官有甘白先生集

陳嗣初云甘白先生詩發纖

穠於簡古寄至味於澹泊

詩話子宜免都水郎歸即朱長文樂圃故地居之詩所云坊存前哲號屋貯古人書也一時名流都為題詠見鐵網珊瑚詩有樂圃江館南湖



江行滇池等集燬於火其孫祝得十之二三於煨燼之餘及士林傳誦之作合為甘白先生集今雕本已罕傳子從其後人星借觀錄之

雨中對齋前楊柳賦楊之枝二章

楊之枝我不如子無知我心之憂曷其已而  
楊之花我不如子無家我心之憂曷其有涯

擬古

我馬既已秣我車亦已膏游子志遠行豈憚終夜勞海  
水自言深泰山自言高去去涉長道歲月疾如埽譬彼  
風中花衰謝不復好惟有惓惓懷日夕不離抱

別張訓導

近識張夫子情深似故知何須雞黍約已有鹿門期此  
別五千里且論三百詩舟行在明發雲樹渺相思

對雨

住近南塘柳蓋扉涼風送雨薄絺衣檐花暗應鄰春下  
沙鳥明隨估舶飛蝸篆登牀延筆格燕泥上壁污琴徽  
蒼苔駁石林間路一月春陰客到稀

山中春盡

蘿磴松巖百摺斜清溪窈窕有人家樹深風送還山鶴  
石上泉流出洞花就竹編籬防早筍當窗出火焙新茶  
門前過澗崎嶇路安得能來長者車

題山水小幀

秋林雨過雲猶濕綠莎亭子小於笠漁榔欲來猶未來  
隔隄驚起雙谿鷁



翠岫樓臺圖

巖下樓臺擁翠霞千章嘉樹蔭窗紗曲闌干外東風急  
人隔珠簾看落花

題画卷

青山歷歷樹重重寺在雲深第幾峰比屋人家西崦下  
夕陽長聽講時鐘

過朱卿宅

鎖却城東燕子樓荒村漂泊幾春秋如今占斷沙河曲  
更嬾全家上小舟

楊

繇 二首

繇字宗繇餘姚人洪武中以人才舉為沔陽倉

副使遷都察院司獄調長泰主簿以獻詩擢吏  
部考功主事謫居滇南有鳳臺貴竹東屯南游  
諸橐

詩話楊君傳詩不  
多頗饒跌宕之趣

雪溪翁山居圖

門前野水可通漁雲裏草樓方著書好山誰臨北苑畫  
斷橋我憶西湖居塵埃自著鷗鷺外霜露正當鴻鴈初  
為報秋風搖落早梅花消息近何如

南城偶題

城南好山何太幽人家對門溪水流春禽啼樹野花落  
雪瀑挂崖嵐翠浮長鑱自可斲靈藥短筇何必尋丹丘



一聲清嘯暮天碧松頂月明人倚樓

戈 鎬 一首

鎬字仲京鎮江人洪武初徵士官禮部主事有

鳳臺集

詩話仲京詩原出於溫岐

題野塘秋景

芙蓉秋色滿銀塘白鷺雙飛下晚涼記得采蓮看越女  
醉騎驕馬觸垂楊

范 準 一首

準字平仲休寧人洪武中舉明經官至工部主  
事有壑甕西游何陋軒諸橐

松蘿谷

尋幽興未涯窈窕入深谷長松生晝寒香蘿蔓春綠  
緜石上葛冉冉籬下菊樵子時相逢和歌自成曲吾將  
從杖屨題詩滿青竹

朱逢吉 一首

逢吉字以貞崇德人洪武中官大理寺丞

寄張世衡

文穆公家四世孫清朝今見幾人存衣冠入市爭投刺  
風雨讀書深閉門坐詠遠山楓葉寺歸從新酒杏花村  
玉灣橋下莓苔路應有徵車故轍痕

冷 謙 一首



謙字啓敬嘉興人洪武初太常司協律郎

詩話世傳協律仙去嘉興府治東北碧漪坊建祠祀之里人禱夢多驗祠三面距水今為土填淤矣協律著作罕傳僅從郁氏書画跋錄得一首

題燕肅山水卷

依稀廬岳高僧舍彷彿商山隱者家我亦抱琴來谷口  
白雲深處拾松花

桂 慎 一首

慎字宗敬慈溪人洪武中官中書舍人謫戍雲南臨安府

登太華山寺

昆明池上古招提樓閣參差近碧雞為愛白雲分半榻

却隨明月過雙溪風前松子當窗落雨後苔衣拂石題  
如此清幽好棲泊為誰又度澗橋西

朱 芾 一首

芾字孟辨以字行松江華亭人洪武初徵授翰林編修改中書舍人

詩話明初詩人善書法者正書則楊孟載張翔南行楷則唐處敬張藻仲草書則宋仲溫周履道章草則盧公武隸則吳主一邵復孺大小篆則張士行宋仲珩而孟辨名尤在諸子之上嘗以所書瘞之細林山中題曰篆冢董徵士良用贈詩云華亭朱茂才好古喜欲顛一掃世俗書習篆忘食眠秦望針之采碧落兼新泉小者案間列大者屋壁懸平生囊橐貲多充買碑錢功深學既精齒壯志逾堅池魚染皆黑鐵硯磨將穿摹搨累萬番期差古人后師法正在茲什襲比蹄筌孫樵文自祭智永筆忍捐嗟我細林山函之瘞其巔聚土封若堂鏡石表為阡寶劍賈胡發玉柙蔓草纏何如篆冢光夜映列星躔錢提舉思復歌云雲間苦嗜古手校科蟲辨魚魯明窗淨几風日佳臨摹一掃千番楮商彝周鼓真吾師蠟扁沉著沙畫錐鸞迴鳳翥龍天矯長戈短劍相交馳書草日積充棟楹保愛何啻壁與珪細林山中一坏土細笈緘滕重閉之合學



士灘哥石硯篇誦  
之可謂好事者也

賦得秦淮送宋仲珩

春漲曉沄沄空明澹孤嶼中流送行舟綠波渺南浦鷗  
從青鏡下人立滄溟語素澈流涼颺員紋散疎雨桃葉  
懷舊題後庭歌弔古因之寄離情前洲采芳杜

宋 璩 一首

璩字仲珩浦江人學士濂仲子洪武九年召為

中書舍人

仲珩工書法真行草篆俱入能品方希直稱  
為威鳳神霄祥雲捧日評者謂太史公之文舍人之書

皆本朝第一而其詩尤駿發  
汗血一蹶未見其止惜哉

詩話仲珩受業於趙古則故精於六書南村稱其大小篆純熟姿媚  
行書亦有氣韻今誦其五言離奇妥帖惜不永天年兼為書法所掩

寄章允載兼簡項思復

憶昔別京畿與子寓官解一見即相驩不翅舊交快維  
時因道塗驅車久行邁忽逢弛擔初欣若身脫械握手  
坐氍毹軟語慰疲憊情投比黏膠意愜甚搔疥項君數  
過子滯下喜方瘥三人互談噓何殊合糾繡驂鑣出游  
衍古蹟探奇怪路入青蓮宮駐足聽梵唄薄晚始旋邸  
傾倒形忘瘵周詳論書譜從容說詩派凡習尚浮華遺  
音日已壞作者固繇夥咸韶混夷韎瀾倒并波隨疇能  
抹危敗顧子樗散材頻年處卑隘杓鑿乖方員甘遭世  
俗賣人將競嘲譏子乃敦教誡苦言加箴規默默使心  
解酒酣示新篇辭源極滂湃却類任公子投竿下羣獐  
應知藝嘉禾薈治絕稊稗讀之神駭驚秋蛩罷嘶喝政



圖藉薰陶別還隔遙界欲即寢食安但復占爻卦浦汭  
守衡茅無從豁矇瞶譬諸鐵在爐伊誰鼓風鞴况乃患  
沉疴軀命猶纖芥侵尋閱暑寒孱弱乏剛夬精神盡凋  
耗面目多腫黧布衾暖閣眠藥貼晴簷曬年來獲告瘳  
書齋仍埽灑後鶴亦爭慶似索煙霞債綴賦詠雕蟲攻  
篆學垂薤有時看飛泉四山寂無吳思取古遺經一覽  
適炙啜蘭膏繼日晷矻矻警昏懈視已常欲然進業慙  
質難志須成絲枲未能脫管蒯篤信宴安中懷毒劇蜂  
蠆蚤暮自深省此語諒非衡近聞子亦歸親朋樂情話  
二里感遺書殷勤持一介而翁幸康彊媿缺牀下拜執  
簡立臺端百壬不敢笑道遠竟莫前動若飛翻鍛歲月

無停輶季秋倏已屆籬菊傍雲肥江山日如画軒車幾  
時來夜雨一燈挂明德正可崇相期各云勤

史靖可一首

靖可鄞縣人中書舍人

詩話潛溪之歸也孝陵諭之云大江春來風浪多宜就裏河達於家靖  
可送行詩蓋賦以紀實也靖可以吏部奏差洪武九年十一月授中書  
舍人載實錄滎陽外史集有  
史行可文可殆其昆弟行

送宋學士

君王親為計歸程幾日攜家出鳳城江上春來有風浪  
扁舟好向裏河行

谷宏一首

宏閩人

一云新  
途人

中書舍人



行經華陰

崔嵬太華出雲中積翠遙連渭水東秋色萬家連遠塞  
暮烟一帶遶離宮秦關日落行人少漢時天陰古殿空  
寂寞武皇巡幸處祠郊木葉起秋風

合亦

李舒章云是錢劉高調  
宋轅文云調既不卑景色

陳潛夫 一首

潛夫字振祖錢塘人官國子監學正

詩話吳人朱景春名所居之軒曰安分勝遠為寫作圖題其卷者甚眾  
潛夫及田子貞詩差優潛夫於洪武十八年二月曾上書言事載實錄

題安分軒圖

一白幽棲白板扉略無塵夢到輕肥摩挲老眼臨書卷  
抖擻閒身稱布衣風竹翠迴琴響近雨苔青滿屐痕稀

客來况說雲山好處處春苗長蕨薇

莫士安 一首

士安名伋以字行更字維恭歸安人洪武初為  
府學教授遷知黃岡縣事入為國子助教

詩話士安集不傳僅見於湖海者英詩集其湖山圖長歌則從吾鄉郁  
氏書畫題跋中錄之永樂初以助教治水江南遂僑居無錫自稱柏林  
居士又號是菴載縣志流寓  
門今人罕有知者附識之

洪武丁丑春題王叔明湖山清曉圖

青山屏列水涯畔白雲練繞山腰半分明曉色澄素秋  
顛倒湖光接銀漢江霞滅盡海噉生巴雪銷多沔水泮  
岌業巔崖高莫梯回合源泉淨堪盥天遠匡廬秋杳冥  
雨足沅湘春瀚漫濃於藍汁可染衣赭若童顛未加冠



盤谷繚通百折深，緱嶺危撐半空。斷澗橋蔭合，踏新涼。  
渚閣香凝坐，平旦短屐扶藜野。興濃輕舸聚，網波紋散。  
南灣農鄰猶閉關，西崦人家未炊爨。僧寺樓臺松滿林，  
漁屋軒窗柳遮岸。陶令秫田誰為耕，邵侯瓜地親將灌。  
種桃莫問武陵津，采芝偶得商於伴。書封鴈帛感蘇卿，  
鱸斫鱸絲羨張翰。濯纓欲待滄浪清，挽衣空歌白石爛。  
樹樹巖花嵐霧重，葉葉汀蒲水風亂。蛺蝶暖依芳草飛，  
鷓鴣晴入叢篁喚。荇藻翻容避釣魚，杉栴不借尋巢鶴。  
壁帙芸枯粉蠹生，岫幌藤穿蒼鼠竄。翠隋梧桐借翦圭，  
幕結絲蘿愛垂幔。米家尚存書畫船，吳綾不減錦繡段。  
人來西北淹壯遊，地擁東南隔奇觀。標靈顯秀環故居，

沉影浮暉在吟案。誰能高深故不兢，我為登臨每無憚。  
當時對景真彷彿，遶次圍闌舊凝翫。丹青物色眼停瞬，  
鐵石心腸顏為汗。蹤跡頓忘今昔非，記憶方驚歲年換。  
半生自笑不歸去，兩足其如有羈絆。泉石膏肓百慮增，  
塵土心胷一朝澣。湖山如此慰相思，天地茫然寄長歎。

繆天白云長篇用韻深穩非作家不能

李 畢 三十三首

畢字宗表錢塘人洪武初國子助教有艸閣集

徐大章云宗表詩緣情指事機動籟鳴無窮按苦索之態而語皆天然不煩雕刻 朱伯清云宗表善為詩精熟清新氣雄而詞暢一出李杜

二公機軸 蘇平仲云艸閣詩多合乎三百篇格律與李杜不遠

詩話艸閣得詩法於李季和然季和猶為廉夫薰染艸閣歌行則一氣孤行獨開生面正如淮陰之師多多益善囊沙拔幟辟易萬人當時四



傑十友二肅二玄各有標榜如此逸氣高格  
顧詩家月旦不及焉信夫知音者之難也

古詩

吾觀詩三百豈徒正而葩其言本情性反覆成詠嗟二  
南乃其端列國多淫鼃洋洋雅與頌制作功尤嘉善者  
固敦厚惡者亦紛拏聖人示我要蔽以思無邪

菜圃為鄰畜所殘

孟嘗久不作吾徒食無魚長齋坐清晝賴此田中蔬僕  
夫勤灌溉引水通溝渠青青日已長盡是辛苦餘封豕  
從何來洊食良可吁一殘枝蔓傷再則根柢除遂令蒼  
翠場轉盼成空虛嗟我在羈旅草野聊暫居惜無專戮  
權悵望徒踟躕踟躕將奈何屏棄犁與鉏學圃聖所鄙  
且讀窗下書

發雙溪

峩峩金華城行李何淹留閏十月初吉始能具扁舟輝  
輝晴旭升莽莽寒煙收篙師戒晨發浩嘯當中流揮手  
謝送者此行實夷猶昔為山林居今作江海遊撫心媿  
麋鹿放跡同鳧鷗丈夫既許國生理焉得謀功成纔拂  
衣庶以追前修

泊鷺鷥灣

朝辭婺女城暮泊鷺鷥灣鷺鷥暝不見但聞水潺潺水  
聲日西流客子何時還長風吹征衣慘澹生愁顏  
息灘



息難復息灘逆上如登天舟行勢齟齬百丈不可牽人  
持白木篙左右拄兩肩倒緣凌風檣俯貼衝波船分寸  
累丈尺始能就其顛回顧望來者相去一丈懸我生匪  
利涉坦易性所便因之戒行險庶茲遠游篇

嘉禾

晨發嘉禾城晴日舒我顏水深野岸闊驛古秋花斑回  
頭指點中已過三塔灣少年所游地頭白今始還沙鷗  
喜我還來往清波間願為忘機翁與爾俱投閒

遣瘡鬼

汝本顛頊子變化逃其形胡不肖厥祖騎龍升帝青而  
為瘡鬼徒屑屑居滄溟復游人間世所在行威靈坐令

命蹇子狼狽汝所丁其寒誰致然其熱孰使令淒淒挾  
絮纒喘喘思風亭肉黃面亦皺呻吟不可聽巫師用桃  
茆醫師進豬苓汝黨固蟠結百莠無一寧嗟汝聖王裔  
區區獨伶俜遷居迺令德肆虐非常經我今賦新詩送  
爾揚歸舫東方有蒼龍鼓腹生雷霆西方有白虎利口  
惟臙腥赤鳥司南方丹砂耀修翎玄武在北門閃目光  
熒熒四方汝無往恐汝罹天刑汝宜返故鄉寒泉肅泠  
泠綠荷以為衣丹霞以為扃珠簾水晶幌貝闕琉璃屏  
飄飄曳鸞旗洋洋下雲輶速行如風火晝夜不可停從  
此勿回首一去三千齡

墨梅



鳥不涅而黔鵠不浴而白其類雖有殊各以見真色画  
師亦何心變幻隨世惑展圖對梅花為爾心惻惻

言懷

今日忽不樂少為川上遊童冠相追隨衣服紛好修紆  
徐既就坂崎嶇亦經丘是時鳴雨餘氣候如清秋嗒然  
拄孤藤聽此涓涓流往者既云邁來者無時休周流信  
無滯至樂常悠悠俗士勿與言永為智者謀

逃難

四郊日多壘勞生信乾坤朝來有警急鐵騎如雲屯賤  
子心實憂焉能守荒村呼兒戒行李一飯同出門路逢  
逃難人紛紛亦來奔或扶耶與孃或挈子與孫十步九  
顛躓欲哭聲復吞間道往方巖前後相逐喧牛羊亦隨  
逐飛橋為之翻我行已巖頂我僕猶巖根脣乾吻亦燥  
何處濁酒樽茲巖既云險况有靈祠存棲遲且茅屋生  
理安得論俯視西北隅殺氣猶昏昏

寄太平諸友

昨日東風吹雨過正值山齋罷書課無官可守真自得  
有酒不飲誰能那此時况當春夏交綠盡園林安敢唾  
出泥已誇籬筍嫩入饌頗憶溪魚大花間紫騮來幾匹  
葉底黃鸝鳴兩個桃巖諸公多俊才遠來相就同賡和  
野人擬作韋曲游諸公忍復東山卧誰謂更深雨復作  
到曉打窗驚夢破寧愁烏帽顛風吹尚恐蠟屐春泥沈



拈毫惆悵題我詩天晴更爲斯文賀

贈地理遠碧山

澗東灑西曾卜洛定之方中楚宮作當時相宅論陰陽  
猶未經營到冥漠後來注意馬鬣封某丘某水尋靈蹤  
封侯作相在頃刻芒屨踏遍青芙蓉遠師本有降龍技  
隨處看山逐龍勢金華一郡凡幾家屢見牛眠得佳地  
我家近住東屏山時與遠師相往還青囊和月挂松樹  
且酌美酒開心顏我聞金陵帝王宅虎踞龍蟠出奇特  
遠師飛錫宜一遊歸來說與漁樵流

踏車行

南岸北岸聲咿啞東鄰西鄰踏水車車輪風生雷轉軸  
平地雪寒生浪花借問老農何太苦低頭欲語還咨嗟  
前月有雨田未耘非其種者紛如麻縣吏捉人應差役  
令嚴豈得營私家况當今日滴雨無陂塘之水爭喧譁  
雖如抱甕沃焦釜蹄涔豈足供泥沙語罷踏車車轉急  
田水何如汗流濕老妻貸穀猶未歸力疾無奈吞聲泣

喜雨行

五日不雨中禾焦十日不雨晚禾死農夫田父心煩勞  
桔槔搨搨徒爲爾俄然雲起從西北一片飛來頭上黑  
六丁雷斧開天關不盡天瓢瀉甘澤沛如萬頃之銀潢  
疾如江漢流湯湯怒如乖龍騰變化颯如白帝行秋光  
在坑滿坑谷滿谷此雨何殊雨珠玉甌窶汙邪無復分



日言終卷十二  
但見芄芄稻花熟東家老翁賒酒勸西家女兒賣釵釧  
青黃未接渾未憂屈指豐年眼中見我歌不獨如元豐  
我歌直與康衢同此身願作飯牛翁耕田鑿井堯無功  
嗚呼耕田鑿井堯無功

誕日醉吟

先生今年五十一兩鬢雖斑眼如漆挑燈終夜何曾眠  
細字蠅頭看書帙既不能握蘭起草趨明光又不能搦  
旗斬將赴敵場布衣十載困江海空有崢嶸磊落驚世  
之文章近來結屋翠峰下白雲遶屋看如画王侯卿相  
不到門自與農夫作鄰舍螳浮缸面新酒渾清晨上壽  
誰稱尊阿兒拜前女拜後此樂欣欣難具論盤餐照眼  
復何有出甕黃壘間青韭山田放豚初告脂潑刺鮮魚  
貫霜柳須臾剥剥啄叩門聲攜肴載酒來諸生陶然  
洗琖復更酌百川一吸如長鯨我醉欲眠卿且去謫仙  
未得其中趣玉山雖倒嗔人扶染筆從容賦長句我不  
願二十四考書中書我不願千二百歲崆峒居但願百  
年三萬六千日日日醉吟懽有餘

北上行送周士約

停君鐵如意飲我金叵羅我有北上行起舞為君歌念  
此北上樂君行莫蹉跎披雲登太行敲冰渡黃河黃河  
連天與天碧織女大笑投銀梭紅雲暖光開玉闕流星  
煌煌夾明月簫韶之音下紫清太液恩波流不竭去年



前席召賈生今年上書薦禰衡鵬搏虎變不可測布衣  
談笑爲公卿爲公卿吾道昌丈夫壯游須帝鄉紅顏才  
子青雲郎文光照曜宮錦裳紫騮馬肥金鞍光蓮花匣  
出三尺霜黃金臺高天中央紫琳作佩聲鏘鏘聖主恩  
深誇陶唐好賢不數燕昭王北上行君莫忘

九鷺圖

何人水墨開毫素白日晴窗起烟霧強將醉眼窺微茫  
乃見江南九秋鷺兩隻長鳴一隻飛兩隻共啄菰米肥  
其餘四隻夢洲渚黃蘆白葦相因依我家曾住苕川上  
綠蓑披雨聽漁唱西塞山邊今有無桃花流水應新漲  
別來幾載棲林巒身欲奮飛無羽翰卷圖高詠風漠漠

憶爾磯頭青釣竿

胡將軍歌

胡將軍邦之良武之豪身長八尺面如鐵敵人見之凜  
凜生寒毛憶昨辛卯歲九州沸鯨濤蒼生日塗炭呼天  
雨泣何嗷嗷吳王氣宇真天人手提秋水三尺之豪曹  
貌貅萬竈會滁上左右環列俱賢髦將軍謁轅門開口  
談六韜爲王之爪牙出入行陣躬韃橐疾如風雨飛千  
艘王命胡將軍發弧發弧爾所操義聲西來動白日電  
光閃爍搖旌旄金陵宣城不日得徽州嚴郡隨風逃洞  
兵三萬餘刃鞘弓藏歿靈旗却指金華城父老爭先持  
酒羔喉衿閩楚信州地將軍又爲殫力營城壕乃從元



戎上台鼎橫金拖紫獨立青雲高將軍未下車民庶憂  
忉忉將軍既下車所犯無秋毫健兒不敢忤民意酷吏  
不敢控民膏男兒務農耕婦女勤蠶繅將軍爲之垣墉  
使生厚民適自樂將軍勞兜鍪貂蟬本無異擬變方名  
爲夔皋嗚呼壬寅春二月肘腋禍所遭三軍盡躑躅萬  
姓皆號咷朝廷聞之爲痛惜遣中使降丹詔遂有光祿  
大夫越國之崇褒有廟有廟依巖嶽春秋二時祠太牢  
吹笙鼓瑟兼伐磬玉杯春酒醜蒲萄画梁文栱倍輝赫  
焚香彷彿來蒸蒿英姿颯爽毛髮豎陰風吹動團花袍  
殿前近侍捫錦條壁上先驅腰寶刀出師或銜枚班師  
或鳴鼓將軍雖死有餘樂魂魄上與星辰邀有子有子  
如將軍志欲與國除腥臊鄰敵侵我疆勇捷如飛猱奮  
身與之戰以一當百戰已鏖將軍陰兵實助之似聞人  
馬聲嘈嘈敵驚靈火徧原野如中羽鏃相呼號我來祠  
下謁遺像秋林葉落風蕭騷雄文大字紀顛末翠珉已  
載黃金鰲嗚呼胡將軍生爲名臣死廟食勸忠之作吾  
其叨

題煙波疊嶂圖

憶昨扁舟上南斗順風看山如馬走前山在眼後山失  
紫翠繽紛落吾手當年見山如画圖画圖得似當年無  
臨軒把玩笑絕倒蚤覺詩思生江湖江風蕭蕭煙水暮  
盡是漁翁釣魚處安得身輕如白鷗江上飛來又飛去



題胡濟源聽泉樓

冷泉亭子深且幽我昔杖履曾追遊山中正當朝雨霽  
坐聽泉水涓涓流初如松風灑萬壑忽如仙佩鏘鳴璆  
又如蛟龍起潭窟霹靂閃電摧林丘黃猿抱子挂秋影  
良久不下聲啾啾是時同行四五人相對毛髮寒颼颼  
乃知福地難久住却載酒壺登綵舟故鄉一別幾十載  
江湖浪迹如沙鷗風塵瀕洞箭滿眼欲歸洗耳嗟何由  
飛來山色入我夢碧松丹桂枝相樛每逢泉石必宿留  
題詩感慨無時休胡君亦是聽泉者曾次磊落非常儔  
何當暇日登君樓與君作記樓上頭

題鍾馗移家圖

綠袍進士掀怒髯飢來嚼鬼如蜜甜酸風苦雨攪白日  
移家欲往山陰尖隨兄小妹臉抹漆眼光射人珠的皜  
鬼奴鬼妾千萬形蟹怪貓妖最蕭瑟勢能使鬼鬼不違  
髑髏在後嗤鍾馗英雄如山堆白骨莫倚區區手中笏

青山白雲圖

若有若無青山之嶙峋欲斷不斷白雲之氤氳往往何  
人得此意高公彥敬下筆藝絕倫我歌紫芝白雲裏白  
雲却向青山起裁雲爲我衣推山作我几松花釀酒三  
千石醉後高歌歌未已歌罷仰天笑此樂人中仙心搖  
赤城霞目斷蒼梧烟左執容成袂右拍洪厓肩五雲之  
佩何翩翩乘風欲往蓬萊巔蓬萊巔渺何處金銀樓臺



隔烟霧青鳥銜書海上來千歲胡麻欲成樹悵不往予  
心茫茫雲浩浩予山蒼蒼人間亦自有真樂還君之圖  
予贈君青山白雲作

題五馬圖

開元四十萬匹馬誰是超然出羣者曹韓筆力非不工  
須信真龍最難寫真龍只有拳毛騮太宗騎此開唐家  
雄姿猛氣世無敵當年識者久歎嗟吳興公子画五匹  
滿眼風雲起蕭瑟一匹玉花鬣且驕一匹飛黃甚飄逸  
駁文殊者一匹雄一匹紫電奔長虹中央正立一匹胡  
青驄遂令四馬皆下風想見承華春苜蓿此馬由來字  
天育殷紅盤袍帽紋縠奚官杖策來監牧花萼樓前風  
日遲五王宴罷何逶迤乃知画師用心苦俟我落筆題  
新詩

送胡季誠北上

杭州從士真文儒乃是丹山九苞之鳳雛春風葳蕤開  
玉樹明月皎潔涵冰壺伊昔跨馬遊京都翩翩采服親  
庭趨太常博士衆所敬儀表自與常人殊嗚呼者舊今  
已無空餘故宅臨東湖嗟余避地頗相見不得再見成  
長吁山中六月火雲熱多君為我來肩輿衣冠如覩太  
常面令我舊事懷姑胥

自注昔與季誠尊翁古馬先生會于楊廉夫姑胥寓舍

呼兒出為佳

客拜遣僕往問香醪沽黃雞啄黍或可餉青韭翦雨時  
堪須夜深秉燭忘夢寐脫巾且挂長松株酒酣慷慨肝



日言終卷十二  
三  
膽露駕言欲問青雲塗飄然挂席上北斗海濤日出扶  
金烏觚稜翹首天咫尺五雲深處陳嘉謨先公餘澤猶  
未已青氈故物還須史青氈故物還須史此行善保千  
金軀

題陳世恭所藏山水圖歌

米公老手無人繼從此乾坤少清氣畫師落筆頗似之  
素練曲折開秋意上有青山萬疊之嶙峋下有白雲千  
頃之氤氲丹楓翠柏森左右年深乃成十抱文白石坡  
頭野亭小一葉漁舟蕩清曉對岸想像忘機翁坐石蒼  
苔談未了我嘗四載客京華每見畫圖成歎嗟垂老歸  
來愛幽獨欲借雲根半閒屋

題南山獻壽圖

將軍落筆怪且雄能寫嵯峨萃嶽萬仞之奇峰模糊猶  
含太古色慘澹頗帶清秋容儼如蓬萊三山翠且重又  
如廬山五老削出金芙蓉千盤萬轉不可測恍忽雲氣  
隨飛龍下有衆灑之流泉上有偃蹇之長松松根羽人  
顏色好抱膝盤陀事幽討云是南極天邊之壽星遨遊  
先天後天老被以青霞裘蔭以白羽葆龜游綠沼沉滄  
波鹿放蒼厓食瑤草有鶴有鶴飛且鳴雪衣丹鼎隨風  
輕兩鶴飄然入紫清一鶴獨立和以簫韶聲手拈雙青  
童載以白玉笙上朝三十六帝京五雲仙樂來相迎玉  
女投壺其聲錚錚白兔搗藥使人長生胡君欣得之喜



氣何盈盈是時七月涼風生君來飲我黃金觥酒酣再  
拜求我歌須臾落筆雷霆轟五岳為之動三江為之傾  
此圖足為仁者壽題以南山獻壽之佳名胡君胡君宜  
愛惜我歌歌罷千金值挂向高堂雪色壁夜夜虹光射  
天赤

煮豆酌白酒歌

戊戌  
前作

煮豆酌白酒豆肥酒氣溫相對二三子其樂難具論君  
不見曉來雨過東家村叢叢豆莢生籬根阿翁提籃跣  
雙足采摘采摘呼諸孫歸來笑指老瓦盆酒波猶帶新  
糟渾田家酒具如窪樽一盃入口春無痕兩盃三盃鯨  
濤奔四盃五盃和江吞須臾飲至百十盃眼花耳熱低  
乾坤憶昨豺虎如雲屯旌旗滿目煙塵昏殺人如麻血  
成海十室九家無一存大臣自合死社稷况叨厚祿承  
君恩近聞省府日筵宴椎牛宰馬齊崑崙吾徒布衣在  
草野憂心惻惻懷至尊嗚呼蕭艾滿城邑馨香不數蘭  
與蓀呼童煮豆復進酒呼兒為我關柴門

王子約雙鈎竹歌

王君金華人画竹誇當代此竹乃是鈎勒之所為坐上  
千人萬人愛愛君為人清拔俗興來踏遍篔簹谷籠籊  
桃枝紛入眼籊籊筵常經目往年曾見吳門道士張  
溪雲歸晚軒中事幽獨有時不作山水圖戲拈銀毫書  
此竹王君筆法乃過之比似張生更神速王君寫竹能



寫形脫略粉墨辭丹青或如金錯刀或如鐵鈎鑠或如  
銀幡寶勝之飄飄或若金節羽衣之婀娜或如白鳳尾  
或若蒼龍擘天機逞其妙形狀何瑰奇唐時亦有蕭協  
律所至清風起蕭瑟眼昏手顫藝轉工一十五莖稱絕  
筆宋時亦有文湖州画竹人推第一流能令萬籟起厓  
谷出牆之梢為最優東坡作竹短而瘠別試龍蔥在林  
僻玉堂多暇圖一枝復有小坡能画石前元作者李仲  
賓琅玕卓立無纖塵薊丘家世不易得父子相傳俱絕  
倫吳興學士趙公子飛白之石誰能比水晶宮中春日  
長移得藍枝落窗几後來又有柯丹丘大葉長梢動冕  
旒天顏有喜頻賜予晚節衰颯江湖秋諸公画竹工画  
影隔簾彷彿瀟湘景我欲鼓柁游瀟湘碧雲萬頃浮天  
光美人娟娟隔秋水欲來不來空斷腸我來乘風發清  
嘯扁舟直過湘妃廟中流鼓瑟聲鏗鏘和取湖南竹枝  
調何如曩昔行李遊京都故人為我共作翠竹紅梅圖  
原父寫梅君画竹價重已壓青珊瑚挂在成均之左廡  
交遊軒冕觀如堵天上歸來十二年紫扉草閣荒山田  
此君風節還依然王君王君聽我語我歌長歌君起舞  
花溪水接雙溪長與君百里遙相望不如坐君西郊之  
草堂歛坑舊硯楮而蒼鵝溪素練雪色光風晴老嫩任  
君寫無使古人專擅場

次何贊府遊壽山詩韻



我昔手持綠玉杖，徧觀壽山寺外萃。律之奇峰天風吹，  
我衣雲氣盪我胷。峰形峙爲五，煙霞有路遙相通。橫秋  
雙澗橋影枕寒潭，空上有欲落不落之怪石。下有半枯  
半活之欹松，一峰凌紫霄，曙色何曛曛。金雞喚醒海底  
日，絕頂尚有蒼涼蹤。一峰翠氤氳，恍如武陵之景迷。西  
東山泉春雨餘，流出桃花紅。左右一峰若覆釜，氣蒸雲  
霧秀所鍾。西看瀑泉吼飛雪，乃有一峰迴出倒挂虹影  
於晴穹。一峰後顧復何似，巔巔巖巖若蟠蛟。龍輸青獻翠  
千萬狀，竝視培塿誇豪雄。香爐紫煙遠，莫致廬山謾詫  
金芙蓉。伊昔當年紫陽翁，二三賢俊題名同。嗟予寥落  
生苦晚，不得親陪杖履遊。其中兜率臺高花雨濛，金仙  
趺坐青蓮宮。何當復約哦松公，靈巖石室幽絕處。笑揮  
白玉塵尾盡，日相過從。

章三益匡山行

戊戌後作

仙人休吹紫鸞笙，聽我一曲匡山行。青蓮居士讀書處，  
至今石室丹霞明。龍泉西南百餘里，四面崢嶸翠峰起。  
先生結菴當畫圖，正與匡山景相似。屋前屋後皆種松，  
坐看百尺蒼精龍。苔皮深含霜雪古，鐵榦返走風雲從。  
一亭下浸蒼波冷，縹緲煙雲成萬頃。中有神魚長比人，  
翠鬢翻動玻璃影。一亭上與浮雲齊，赤闌干外青天低。  
分明投壺笑玉女，彷彿出海聞金雞。東南一亭隱林樾，  
地位清高隔炎熱。人間赤日如火流，疎簾琅玕自蒼雪。



明詩綜卷十二  
最其秀者環中亭周遭萬朶芙蓉清朝來爽氣落吾袂  
蘿風吹日天冥冥鶴怨猿驚歸未得繡衣今作青雲客  
故山回首五情搖歸夢時時到寒碧自古山林鐘鼎同  
先生况有前賢風少待功成拂衣去入門依舊山花紅  
雨過許叔大

山雨露衣濕江雲度水寒也應如杜甫曾此過蘇端綵  
蟻春漿甕青絲野菜盤平居謝拘束與子罄相驩

紅梅

滿林紅雪影參參夜靜和春浸碧潭却憶騎驢二三月  
杏花小雨看江南

暮歸

山腰小路曲如蛇薄暮疎疎雨潤沙醉裏亦知春色老  
西風開遍木棉花

明詩綜卷十二



明詩綜卷十三

小長蘆 朱彞尊 錄

錫山 秦道然 緝評

管 訥 三十六首

訥字時敏松江華亭人洪武中徵拜楚府紀善  
陞左長史乞致仕王請命于朝留居本國祿之  
終身有秋香百詠蚓竅還鄉紀行等集

丁鶴年云時敏詩氣

象雄渾襟懷曠達用事親切措辭醇雅黃文獻公謂文章莫難乎詩詩莫難於近體時敏體製嚴整間出新語亦復清俊非文獻所云難者與又云五七言律至晚唐氣漸衰靡不可為法惟絕句詩至晚唐尤為精緻宋人不得其門而入元人惟龍麟洲范清江虞青城得其三昧餘或偶得之而不純時敏絕句俱有法度豈非常私淑於三公故邪又云時敏詠物詩形容精密非筆頭有五色花者不能胡粹中云長史古製衣近體春容乎意度鏗訇乎節奏追琢乎文章其言麗以則其思深以遠其義葩而正溫柔敦厚不迫不切方諸古人亦未多讓



史樂府五言有漢魏體律詩源出於盛唐如碧海沖融天光萬頃汪洋  
莫窺其涯矣 楊仲舉云長史文章務以理勝尤長於詩 廖鳴吾云  
長史詩清新幽柔  
可與袁景文並駕

靜志居詩話昔人名集往往自謙若殷文圭曰鏤水張舜民曰畫墁晁  
補之曰雞肋林敏修曰無思葛立方曰歸愚薛季宣曰浪語樓鑰曰攻  
媿王與鈞曰藍縷王翰曰敝帚洪希文曰軒渠未易悉數明初猶然劉  
基朱同皆曰覆瓿高啓曰缶鳴董紀曰西郊笑端華幼武曰黃楊周是  
修曰芻蕘黃淮曰省愆雷貫李馨皆曰知非羅泰曰覺非王文靜曰蠅  
聲管訥曰蚓竅是也管師事廉夫集經鶴年論定春容疏越豈出景文  
之下而說詩家入選寥寥卧子舒章生長五茸知  
有素而不知有管竟置不錄徑寸之珠詎可遺哉

### 聽松樓為國學林敬伯賦

涼飈度中林長松發清響震蕩出巖巒蕭騷納天壤初  
疑絲絃作復訝驚濤上倏爾若崩奔悠然亦平廣大音  
本無聲至理奚有象復動陽始生姤靜陰已往達人居  
高明會茲適真養心靜聽轉聰慮屏神逾爽豈彼塵市  
間啾啾局塵坱好招陶隱居山中一清賞

### 和陸伴讀闔過梅根

江行愜素懷遐覽匪游冶開蓬望九華隱隱白雲下素  
波明遠川青天入平野煙樹澹欲無風泉斷還瀉因知  
漢陂舟差勝習池馬斯游樂未央我輩胡為者  
丁鶴年云  
辭嚴意新

### 和吳教授晚泊大信阻風

樓船溯流上高帆阻長風大江浩無際一氣何鴻濛回  
望天門山峩峩相長雄洪濤走其下屹立西與東不有  
浮海歎豈無濟川功大鵬度寥廓斥鷃守卑叢物理固  
有定世事徒息息張燈啓華筵一笑杯酒中

### 曉起



真館曉晴初官清遠塵俗怡然對簡編庶矣忘榮辱遙  
峰擁歸雲高城澹微旭落盡冬青花江南雨新足

寫懷

朝回憩公館殘陽坐來暝疎雨過高林華泉出東嶺流  
光晨復晡朱顏豈吾永故園歸何時悠悠發深省

二隱圖

溪上放舟迴山中負薪暇一笑偶相逢於焉遂清話寧  
知有秦晉况復論王霸回首總忘機青山夕陽下

從征古州蠻迴塗紀驛

王程不敢緩四日下辰陽古木將軍廟春波使者航城  
依山勢險江納雨聲長莫上觀瀾閣傷心在異鄉

右怡溶

曹公兵敗處今識在嘉魚赤壁三分後烏林百戰餘橋  
浮春渡闊舟泊夜江虛千古英雄事悲涼太史書

右石頭口

桃花江上驛春水賣新魚滿尺銀堪比千鱗錦不如因  
歌悲客裏每食感王餘江海親朋少誰傳一紙書

右魚山

銅爵妓

銅爵高臺上西陵古墓邊君恩徒自重妾貌竟誰憐羞  
掩歌時扇愁登舞後筵惟餘漳浦月三五夜空圓

答友雨中見寄



雨聲連曉夕牢落閉幽扉屋漏頻移榻江寒更覓衣野  
鳥飢自下水鳥濕還飛爾亦忘機日終同理釣磯

郊居

移家雖偏側只此足幽居茅屋三間小春田十畝餘人  
來論稼穡自學把犁鉏東舍催租急烹雞酌小胥

姚氏野春堂

野外茅堂不掩扉堂前風日散晴霏梨花門巷清明近  
春水池塘燕子飛每約鄰翁同社飲更從田畯勸農歸  
明朝我亦尋春去小試東風白苧衣

荅吳高士見寄

青鞵布韞木棉裘合是山中隱者流舉世可無劉越石  
薦賢誰是呂婆樓秋風泖蟹年年上春水沙鷗日日浮  
好為攜琴并載酒三高祠下放扁舟

送瀘州判官孫彥博

新除貳守向瀘川西上長江萬里船行李莫辭為客遠  
判花政喜得君賢官鹽歲汲千家井火米時收五月田  
緩帶從容有佳興寄詩細寫薛濤牋

寒食

三月東風大放顛今年為客倍淒然杏花時節偏聽雨  
寒食人家不禁煙千里故鄉愁共遠一春白日夢相牽  
天涯草色青青處祇憶千山墓下田

對雪



半年南國不雨落一夕北風吹雪來城中米價政爾貴  
江上梅花空自開騎驢朝士曉未出射虎將軍夜不迴  
寒齋獨坐更愁絕飢鳥下啄青莓苔

題陸二闔墨梅

青禽枝上月如霜夢覺羅浮欲斷腸却憶故園池館裏  
看花一月不燒香

墨窗為越人趙撝謙賦

女媧立極斷鼇足羲畫之先無刻木始觀鳥跡製文字  
夜鬼哭天天雨粟篆隸變化生八分行草復作何紛紛  
六書古制既茫昧載籍况遭秦火焚後之作者不可數  
形聲寥寥眇千古更論得法神妙間自信臨池心獨苦

君居於越文獻邦家藏金石書滿窗磨穿青州老未已  
萬斛巨鼎疇能扛吳興宗人已物故浙河東西誰獨步  
君今有志繼絕學砥柱中流見孤注剡溪百畝冰雪光  
玄霞一斗松煤香滿堂賓客看揮灑風雨颯颯龍鸞翔  
我嗟塗鴉手如棘屢欲從君問奇畫君還許我載酒來  
我捧千鍾勞君筆

稼村贈鄉人孫原璘

我家三里汀前住茅堂政近桃花渚學經不明欲歸耕  
佃得官田廿餘畝有書盡賣買農具甘作東屯種田父  
侯疆既足把犁鉏餉婦猶能載筐筥田中蠶稗日自除  
牆下蠶桑春可取秋風禾黍既登場冬日雞豚復盈圃



全家衣食幸餘饒老穉那知有辛苦東鄰擊鼓送農官  
西舍烹羊祀田祖且喜征科一事無况是豐年好官府  
縣吏催租不下鄉半夜無人打門戶官糧輸足私債無  
一村帖然如按堵自信於焉老此身豈謂年來繫簪組  
汨汨黃塵沒馬頭白水青山竟虛負羨君學稼如老農  
久抱長材隱家墅奉親菽水喜平安教子書詩識今古  
我今不蠶亦不耕素餐厚祿知何補幾時上疏乞東歸  
白頭相尋願為侶與爾擊壤歌堯年五日一風十日雨

全將軍歌

全將軍壯且武前年去年殺兩虎受賜黃金百兩歸醜  
酒椎牛宴同伍意氣驕矜不可當自謂千人何足數今  
年搏虎東城下虎亦憑陵肆其怒一挾將軍雙目睛可  
憐竟作荒郊土烏乎勇不可恃利不可取汝不侮渠渠  
敢侮汝不見東海之濱釣魚父白頭龍鍾八十五

桃花歌次韻答季翔

春來看花須及早莫待韶光去如埽年年花發看應遲  
幾多狼籍被風吹今年無風亦無雨千樹桃花紅爛吐  
香塵繡轂動游人流水瓊筵出歌女天氣豔陽三月時  
倚闌吹徹玉參差百壺送酒莫停飲祇恐落花辭故枝  
落花飄盡春無迹著意留春花可惜花開花落一番春  
與君莫作傷春客會須日日醉花前不放閒愁到酒邊  
有花可看酒可飲但願以此終殘年



鷹雞行

白日中庭忽風過鷹攫雞雛半空墮誰家失之無處尋  
家奴拾得如拳大毛血淋漓殊可傷性命幸脫飢鷹腸  
山妻叮嚀勤餵飲愛護真如孤鳳皇錦毛漸長雙冠聳  
可愛花陰鬪時勇我雖老饞不爾烹留取年年作雛種

春江捕魚圖

玄真坊中老孫子老去今年不知幾綠蓑短短僅遮身  
自小求魚足生理魚倉蟹舍小蓬門一帶編籬住江涘  
昨夜青山得雨多門前三尺桃花水大家漁具都上船  
水面紛然若浮蟻小兒捩柁立船梢老婦供炊在蓬底  
大繩屬網絕中流東船纜下西船起須臾兩船相向開

來往風波疾如駛前船得魚先上城後船回篙刺沙觜  
此賓此主尚杯盤樵青已卧蘆花裏醒者尚釣醉者眠  
東去西來隨所止不欠官家魚稅錢榮辱從來不干已  
我家江南山水間煙樹參差絕相似作客天涯未得歸  
一見此圖心獨喜俸錢幾時當買山小築茅堂三泖尾  
白頭方是謝官時也學漁家從此始

少小

少小從行伍而今作飲徒博錢尋劇孟買劍問風胡結  
伴軍中戲嗔人醉後扶黃金三萬鎰誓娶陸家姑

獨坐

獨坐茅堂上長吟不下牀亂書堆几席疎雨過陂塘野



日言總卷十三  
燕衝簾入江花度水香應須存晚計次第學耕桑

寄淞上友人

憶昔都門把臂時殷勤索我送行詩客邊賴爾能相慰  
別後令人有所思芳草暮雲愁忽忽落花春雨鬢絲絲  
東歸艇子如堪買定擬尋君澗水渚

題王秉正雲林清隱

青林白谷水雲鄉隱者深居一草堂百道松泉當戶落  
四時花雨入簾香門前車馬紅塵遠座上琴書白日長  
滿目故家風景在不須重画輞川莊

題伴讀董時貢所藏山水

公館多清暇林泉愜所探人家如谷口風景似江南斷  
逕荒深蘚崩厓老巨楠鯨波通海去鳥道與雲參江艇  
維晨渚巖扉掩暮嵐雨田收赤黍霜圃摘黃柑未築清  
風屋先尋白石菴醉來休荷鍤老去願投簪許我閒身  
在從渠俗慮耽偶然忘世累聊謝望雲慙

墨蘭

青草三間亭下蒼梧二女祠前欲采幽芳寄遠月明秋  
水涓涓

送馬駿赴京

黃鶴磯頭上驛船柁樓搗鼓下晴川客行二月梨花後  
人別東風燕子前

贈別



草色青青漢水新，異鄉聽雨怕逢春。  
客懷最是今年惡，頻向東風送故人。

題畫

柴門春盡動鷗波，樹色山光雨後多。  
老去無官長自在，醉眠江閣聽漁歌。

吳農四時歌 三首

家有田廬泖水東，門前九朶翠芙蓉。  
鄰翁報我田官至，明日花朝候勸農。

浜北浜南雨一犁，陰陰桑柘鶉鳩啼。  
木龍閒挂茅檐下，百畝青秧已插齊。

種得紅芒與白私，五風十雨似堯年。  
高田無旱低田潦，多辦今年賽社錢。

林 溫一首

溫字伯恭永嘉人，官長史，與弟常俱以詩名。  
有栗齋集。

盤山道中

盤山嶺頭春雨多，天台鴈蕩雲相摩。  
鷓鴣啼入竹林去，我行不得君奈何。

貝 翱二首

翱字季翔，崇德人，助教瓊之子。洪武中官楚府。  
紀善有平澹集。

詩話紀善集以平澹名，故管長史寄詩云：花竹臨窗筆硯清，初秋一雨便涼生。錦囊平澹詩千首，近日新編幾卷成。詩如夕陽山好樓中見春。



水船齊樹杪行信乎平澹矣  
所云山者蓋指及史二山

擬古

妾有綠綺琴中含鳳皇音不彈黃鵠操試作白頭吟河  
中錦鴛鴦比翼相因依落花隨飄風各自東西飛物情  
有不同貞心以為保春葩折秋霜容華豈嘗好芙蓉出  
涿水見別汚池中白璧薦泥塗乃與瓦礫同妾有五色  
絲為君製衣裳朝朝勤拂拭夜夜為薰香將心置君腹  
知君不相忘

吳門會故人樓文淵

憶曾相識自兒童二載雲間席硯同深院鈔書桐葉雨  
曲闌聯句藕花風當時壯氣凌諸子今日衰顏對兩翁

高卧田園真自樂宦遊媿我尚西東

張壁一首

壁字景辰陳留人徙華亭洪武初鄉舉除潞城  
知縣終蜀府典寶

詩話陳留張樞夢辰徙家華亭城東門築室曰讀書莊陶南村贈詩云  
幅巾短杖林和靖斗酒長篇李謫仙又云寫書竹簡拈鮮碧臨帖箋藤  
寫硬黃或勸之仕不應日與弟子講春秋人目之曰林泉民貝廷琚為  
作傳其弟景辰亦能詩有過嘉禾詩云梭頭艇子輕于葉雪色沙鷗白  
似鷺可入画也

橫溪

扁舟東來歌扣舷四顧雲水心茫然蛟龍欲唾先作霧  
星斗滿身如在天打鼓賣魚江雨歇看山濯足溪風顛  
解衣典取酒一石醉伴忘機鷗鳥眠



浦源

六首

源字長源無錫人洪武中晉王府引禮舍人有

浦舍人集

長源聞林子羽老於詩學欲往訪之無由以收買書籍至閩子羽方與其鄉人鄭宣黃玄輩結社長

源謁之衆請所作至雲邊路繞巴山色樹裏河流漢水聲驚歎曰吾家詩也遂邀入社 沈山子云舍人詩如舞草從風偏反有致

詩話長源居九龍山中築聽松軒凌彥翀為作記其後舟經淮河溺死故王達善祭以文云長源之文豔若天葩云何不幸竟墮泥沙詩雖與

子羽同調然才不逮林當與二玄伯仲句如聽雞曉闕疎星白走馬春郊細柳黃細雨疎燈聞落葉斷雲高樹見明河雨中黃葉孤村路湖上

青山遠寺鐘三月春陰垂細雨幾家寒食起新烟春潮渡口停官舫夜雨山頭見驛燈衣上暮寒吳苑雨馬頭秋色晉陵山潮生漁浦曾看下

雨過鄰家竹許鉏官路暝烟迷驛舍郡城寒火出更樓青山馬尾彎弓見画角城頭帶月吹暮雨燈明湖上塔秋風砧響郭西家杏花寒食春

江店榕葉熏風瘴海船今夜風傳何處笛他鄉月照故園衣寒廳掩雪晨衙散暮郭連山夜燒明均有風韻匪僅雲邊樹裏一聯而已亦善画

山水竹石學倪雲林程原道詩所云雲林弟子浦長源也

### 結交行

敵國不在遠舟中乃可見炎涼不在時交情乃可知昔

作通家好齊言永相保一富有一貧便成行人相逢

不相識薄夫堪歎息我不願傾北海尊亦不願書翟公

門但願同心二三子百年無改共生死

### 送賈文學入京

春城送別已斜陽花發官亭酒正香遠騎青山江上路

新鶯細柳禁中牆疎星北闕趨朝早澹月南宮聽漏長

誰謂賈生年最少獨能陳策輔君王

### 悼潘處士

先生愛酒不憂貧賣藥城隅幾度春夜雨忽銷丹竈火

秋風偏拂總帷塵空山送葬多遺老片石題名有故人



我欲持觴酌丘上野煙芳草謾傷神

留別甘露行師

秋山松柏正參參游子登臨酒半酣今夜阿師雖對面  
明朝江北望江南

送友人

孤舟春別萬花西雲淡山清水滿溪料得客愁何處是  
綠陰官舍聽鶯啼

懷湖南周包二山人

每懷周益能歌詠况復包搗善講論夢繞南湖春草碧  
夕陽微雨掩柴門

陸閩一首

閩字伯陽揚州興化人楚府伴讀

江上暮雨

荻蘆沙上風竹樹山頭霧疎雨忽新涼惆悵川光暮遙  
遙孤帆征渺渺滄江渡停櫂問漁人長干幾程路

桂衡一首

衡字孟平仁和人洪武中錢塘儒學訓導遷山

東建文庚辰授谷府奉祀

之

孟平刻意於詩日課不輟又喜為小詞瞿宗吉極稱

題蕭翼賺蘭亭圖

使星東犯斗牛來猿鳥忘機豈見猜莫笑老僧藏不得  
昭陵玉匣有時開



詩話復州裂本蘭亭卷首有錢舜舉畫蕭翼賺書圖陶南村謂鴈行定武宋理宗賜賈平章一百十七本此其一也舊藏吾鄉郁氏

杜環一首

環字叔循廬陵人晉王府錄事

題画

每愛江山趣停杯看画頻千峰青不斷萬里碧無垠雲  
樹參差晚鷗波浩蕩春扁舟何處客飄泊正愁人

張紳二首

紳字仲紳一字士行濟南人仕明為浙江布政

使徐子元云方伯詞格清健管見一斑知其為豹云方伯詩文不經意而自成一家蓋北方豪傑之士也

詩話方伯工大小篆精於賞鑒法書名画多所品題撰法書通釋一卷自稱雲門山樵亦稱雲門遺老齊東自周公謹而後復有此人其詩不藉雕琢琅然可誦如湖中玩月詩地與樓臺相上下天隨星斗共沈浮亦佳句也

題画

高樹漏疎雨滴瀝下銀塘美人卷簾坐寶鴨添生香風  
吹綠荷葉露出雙鴛鴦

送人赴安慶幕僚

舒州城在大江邊我昔過之曾繫船年豐米穀上街賤  
日落魚鰕入市鮮山起正當官舍北潮來直到驛樓前  
知君此去紅蓮幕民訟無多但晝眠

陳約一首

李時遠云眼前景物信口道出自不可及

約字博文嘉興人洪武中官大理寺卿出為山  
西布政使與弟綱繹緝竝有詩名

錦屏



赤城多奇峰錦屏亦殊勝不知何仙人遺蹟在幽徑松  
霏灑石牀竹雪墮風磴徘徊對巖花忽送一聲磬

董紀一首

紀字良史以字行更字述夫上海人洪武初官

江西按察僉事有西郊笑端集

張汝弼云良史詩率漫若弗冀有傳者

詩話述夫元之耆舊其詩賴善卿編之大雅集中題海屋云過橋雲磬天台寺泊岸風帆日本船亦不為率漫也

短歌行

山鳥日日喚提壺勸君酒盡須更沽莫計囊中錢有無  
人生百歲幾時好大是愁多歡樂少朝見開花暮落花  
昨日朱顏今日老為君起舞為君歌少年不樂奈老何

謝肅一首

肅字原功上虞人舉明經歷官福建按察僉事

有密菴集

詩話原功謁貢禮部玩齋於吳山仰高亭進曰先生之門亦有瑰偉儻  
儻拔出之士乎時貢奉詔漕閩廣粟當泛舟大海貢語曰子能從吾游  
乎對曰丈夫觸蛟龍犯風濤如行衽席上爾遂同載至海昌屬海上多  
警因留居州北執經問難凡一詩之出一文之就折衷論議必當於理  
乃已既而貢沒於寓舍原功經紀其喪刊其遺集及出按漳泉坐事被  
逮孝陵御文華殿親鞫肅大呼曰文華非拷掠之地陛下非問刑之官  
請下法司乃下獄獄吏以布囊壓死風與唐處敬  
齊名號會稽二肅其詩雖不及處敬亦磊落不凡

馬陵行

客行忽不樂停車馬陵間上有悲風古樹之蕭瑟下有  
哀壑流水之崢嶸陰深壞道餘古雪斬巖兩壁堆積鐵  
石面苔封勁箭痕草頭露滴將軍血青熒燐火黃昏明  
呼號木魅啼山精應羞刎頸償斷足此氣千載真難平



西流沂水東滄海勝負孫龐兩安在為提寶劍舞尊前  
落日雲霞射光采

藍

智

七首

智字明之崇安人明初應薦授廣西按察僉事  
有藍澗集

詩話二藍出處不同藍山藍澗二集  
選家誤有參錯今依明初雕本刊正

客建上將歸山中留別銜典籤

入山願遠遊出山願早歸羈懷苦無棕芳序倏已非  
瀾江海流紛紛花絮飛清霜變玄髮游塵化緇衣  
艱危迹易垂少壯心轉違雲鴻每獨往梁燕當疇依  
野樹滯殘雨荒臺淡斜暉浩歌綠水曲空拂黃金徽

書懷寄示小兒澤

昔我南澗來遂謀西園居蕭蕭桑柘陰下有比屋廬  
交枝轉黃鳥澄波躍文魚花香入戶牖草色連階除  
衡門閉白日高詠古人書目送遠山雲心游天地初  
貧賤固可樂富貴將焉如

河池縣

連峰入河池路險徭人村喬木盡參天白日為之昏  
上有高石崖下有清水源蕭蕭篁竹叢落日聞哀猿  
職當觀民風載驅隰與原俯念遠人苦來宣天子恩  
撫此風景異懷哉惟故園

雨



黯黯雲垂野瀟瀟雨滿林晚山歸鳥盡秋草閉門深落  
葉蕭條樹空城繼續砧煩憂兼獨立誰識此時心

曉發來賓縣

宦遊同逆旅侵曉逐征塗候一作空館殘燈小長江落月孤  
鄰雞催去馬城柝起棲烏物色兼人事息息歲欲徂

出雲藤驛

又出雲藤驛扁舟更向東地蒸秋有瘴江闊夜多風旅  
夢驚啼狄鄉心託斷鴻天涯看月色不與故園同

雨中同孟原僉憲登嘉魚

高閣流鶯外荒城駐馬前江寒三月雨春老百蠻天折  
柳悲橫笛飛花落釣船乾坤總羈旅把酒意茫然

王佑二首

佑字子啓沂弟洪武三年舉教官擢監察御史  
出為廣西按察僉事改知崇慶州有長江萬里

橐

陳一德云子啓辭立千仞不負所學雖賴蕭氏刻集以傳而其得意者無幾梁用之云子啓先生以校官舉與永豐丁堅子節同邑劉毅原寔等一十八人俱同日俱拜御

史所為詩沉渾雅淡質而不俚華而不媚  
詩話王氏二妙子啓詩遠遜子與其擢御史也事在洪武三年五月二十一日中書吏部奉旨選天下教官入觀奉天門適太史奏文星見帝親擢十八人俱為監察御史次日詣武樓下賜袍帶二十五日之任臺官傳命賜燕集中有紀恩詩七首其東胡僉事子祺詩云聖主親除十八人與君同郡最情親寄秦郎中文剛詩云奉天門下共恩榮十八人中第二名寄趙合州夔馬綿州真詩云人生良會不可常聖恩同擢那能忘是文剛也夔也真也皆在十八人之列矣而實錄載與選者十九人吉水胡子祺桐廬魏潛王納河西李顏永豐丁節永嘉許宏士萬安夏瓚樂清李時可衛輝陳士舉龍泉劉毅蕭暉合肥夏起瑞安馬漢分宜劉沂平陽孔希普永新歐陽子韶泰和王子啓安福歐陽楚廬陵胡伯清而無文剛等三人姓名恐國史所書未若子啓詩集之得其實也又海桑陳氏書王僉事事蹟第云以僉事除崇慶知州已而得投間歸鄉而集中有獄中述懷三首其一云有枉不



能直呼天天不聞厥初正田賦思以上報君豈其被蛇虺糾結情紛紜  
嫌疑既先入真偽無由分其二云沃壤衰千里曾無水旱憂亂來地無  
主官賦籍未收下車日經理比屋皆子仇太倉得稊米憲網增罪尤吾  
豈厚歛者仰天思悠悠其三云蜀州古險塞其俗凶且強有司坐罷悞  
譬以羊將狼紀綱稍自振螫毒不可當我徒剛易折衆以凶為良誦其  
詩可得獲罪之由矣蓋子啓政尚嚴厲其在廣西時尋適為按察使胡  
子祺曰古刑新國用輕典子啓曰蠻方素昧君臣父子之分黷倫傷化  
不及此明禮法以示勸懲後將難制迨從其議其牧重慶征科未免過  
嚴因而坐累迹近重斂  
此陳氏諱而不言也

### 次梧州

蒼梧平遠水如苔日出官船盪槩開五筦江從南海去  
九疑山跨道周來乘槎蚤戶緣流住輸粟徭民出峒回  
聖代分巡方遣使咨詢敢憚徧蒿萊

### 荆南舟中寄華容孫景賢

故人不見十年餘聞就華容早卜居湖上屢停千里櫂

嶺南不寄一行書別來每恨知心少老去翻令會面疎  
題句荆南煩去客早春問信向茅廬

### 彭正德一首

正德字伯仁溧陽人明初以薦官福建廉訪使

### 西州即事

一雨洗空碧江城獨倚樓山銜殘照沒水挾斷雲流燈  
影深村夜鐘聲古寺秋西州舊遊地薄宦此淹留

### 程國儒三首

國儒字邦民歙人徙居德興至正進士授餘姚  
州判官攝紹興錄事洪武初知南昌府被逮暴  
卒有雪厓集



越城謠

越州城城何高四十五里之周遭窪地填為基坡坨鑿成濠白晝鞭笞夜擊坨石民之骨灰民膏越城雖高越民勞越民勞勞未已我田未耕又科米忙忙築城歸種禾又恐無米供官科禾苗未青得秋雨城吏打門夜如虎為言雨後新城摧要我荷鋤城上來城泥不乾不敢回又恐夜半聞驚雷城頭一雨城一動越民登城向天慟民心似與雨有讎天意實謂城無用當年當年天下平天下無賊越無城乃知在德不在兵

信州糧謠

信州糧糧何艱十鍾一石萬里間朝發錢王隄暮過嚴陵灘舵尾白浪如銀山朝渡蘭溪州暮宿龍丘灣峻如牽車上鬼關督吏馳檄夜傳箭布帆無風河水乾去年糧船未及岸今年又運八百萬只知彼地荒不知浙東天亦旱只知彼地饑不知役戶家無飯家無飯儂莫愁願化鐵騎為耕牛願銷鋒鏑為鉏耨戰場闢作畎與溝壯士荷甲歸田疇風雨時調禾黍秋禾黍秋飯不足浙東又移何郡粟

次樂秉德韻

傷心世事淚潛潛已付餘生作等閒羝乳尚能持漢節雞鳴那得出秦關黃花時候多新酒綠樹門庭是故山日夜思親頭盡白何人為賦大刀環



金 綱一首

綱字子尚嘉興人元季舉鄉試洪武初知蘇州府以上書請減賦額賜死

詩話子尚在元季雅負詩名家有詠軒周致堯為賦詩其守蘇州也以百姓苦官民田賦不齊里胥因緣為姦乃上疏請減賦額觸高皇帝怒賜死王文恪姑蘇志柳太守嘉興志具書其事考洪武中蘇守三十人左謫者吳懋坐事去者何異張亨被逮者王暄丁士梅湯德石海王繹陳彥昌張冠黃彥端坐贓黥面者王文而子尚與魏杞山皆坐法死當日領郡者亦不易矣

王彥強破屋風雨圖

讀書幽澗濱茅屋走風雨窗疎木葉鳴月暗燭花吐隱憂不可寫俛仰慕前古美人何由招娟娟隔秋浦

馬 琬一首

琬字文璧江寧人洪武初仕為撫州知府有灌

園集

詩話文璧以畫名詩亦清脫

西湖竹枝

湖頭女兒二十多春山兩點明秋波自從湖上送郎去至今不唱江南歌

盧 熊一首

熊字公武崑山人元季吳縣教授洪武初授中書舍人出知兗州府坐累死

遊銅井山

行春入銅山披榛訪苔碣展席具琴尊譚詩愒林樾溪柳漸生萑谷鶯未調舌文漪細含風小梅清映雪春彼



素心人寒香不堪折

馬治一首

治字孝常宜興人初為沙門洪武初知內丘縣終建昌知府有荆南倡和海漁集

張公祠

張公古仙伯不樂雲間遊騎驢穴山腹古洞開清秋空青凝丹室積翠結石樓玉女跪而化銀漿冷不流芝田水精鹽華屋珊瑚鈎神界杳莫測鬼工信難侔勢輕壺公壺量狹禹九州繞出具區底仰見崑崙丘烟然一束縕吾欲窮其幽

甘瑾十首

瑾字彥初臨川人明初嚴州府同知一云官翰林待制張仲舉云

彥初詩如美女簪花徐子元云彥初工於律牙戟森然望之可畏顧玄言云二守思頗清僻如一瓢風外樹雙屐雨中山錦衾成獨旦羅扇覺先秋亦是高唱

詩話明初臨川詩派專學唐人者揭孟同甘彥初也尚有張可立甘克敬惜其詩不多見

題何梅閣山居

迹不到城市逢人無厚顏一瓢風外樹雙屐雨中山流水春喧碓歸雲暮掩關憂時心未已祇益鬢毛斑

題張氏竹園別業

避難疎狂客長貧少定居采芝空有曲種樹豈無書擬製東山屐看馳下澤車肯容疎嬾迹來與狎樵漁

贈人戍襄陽



漢水荒城外頻年汗馬場舟車通饋餉部曲雜耕桑幕  
府文書暇烽樓警邏長山公有愛將日醉習池旁

梅溪宿徐橘隱者寓舍別後寄謝

不見故人久吟愁入鬢絲試呼村舍釀細論草堂詩夜  
雨西窗燭春風別墅棋滄洲如有約歲晚共襟期

讀文丞相傳

萬里冰天泣楚冠南雲歸計路漫漫尚圖一旅興王易  
不念孤兒立國難樓櫓海門西日暗劔歌江介朔風寒  
九原負痛遺編在朔雪殘燈掩淚看

水南晚眺

山風蕭蕭羣木落寒日黯黯孤雲低江雲欲雨復不雨

野鳥將棲還未棲歸人入夜望煙火行子傷秋聞鼓鼙  
水南山川遶城市正好買地躬耕犁

社日

楓樹林邊雨脚斜兒童祈賽競誼譁雞豚上戊家家酒  
鶯燕東風處處花野逕歸時扶醉客叢祠祭罷集神鴉  
瀕湖生意傷多潦預祝汙邪載滿車

寄張可立

旅泊他鄉有歲年南塘水竹卜居偏得錢日閉君平肆  
載酒秋尋賀監船葭葦近通門底巷荆榛遙帶郭西田  
東歸亦有蓴鱸興矯首滄浪若箇邊

西師



中興寔藉羣公力反正終歸萬姓心霧雨銅標蠻徼闊  
山河鐵券漢恩深明珠翡翠殊方入天馬蒲萄遠使臨  
北極即瞻佳麗氣南雲足聽凱歌音

雨中書懷

南窗坐掩讀殘書落盡梨花雨點疎短夢或因中酒後  
輕寒已過禁煙餘芹香墮几初歸燕泉脈通池欲上魚  
搔首故人懷別久欲憑尺素問何如

張著一首

著字則明永嘉人元季游學至吳遂居常熟洪  
武三年領鄉薦知膚施縣遷臨江府同知

秋興

故園東望海西頭幽事長懷九月秋竹几山明渾見画  
糟牀酒熟不知愁霜寒秔稻肥黃雀水淨芙蓉映白鷗  
隨分耕漁聊自適無端垂老向延州

蕭翀一首

翀字鵬舉泰和人蘇州府同知

詩話鵬舉為劉子高弟子編其師集以傳者也詩格畧畧不如其師遠甚

宿平陸村

昔年曾此宿今日是重遊兵後人煙少村中草樹稠霧  
開螢照夜月霽鴈鳴秋明發前途去逢人問鎮州

包聖一首

聖字師聖江陰人岳州府同知



和韻荅陳漢章

風塵滿眼宦情微卜築從今與世違  
碁局未收山月上  
爐煙將斷洞雲歸謀生底用千金產  
送老惟甘一布衣  
肯共野人忘爾汝來朝騎馬到荆扉

白范一首

范字以中紹興山陰人洪武中黃州府同知

薊州

西來山盡處始見薊州城地擁三門峻  
天迴一面平人煙多戍卒市語雜番聲  
回首松亭道秋風幾日程

周矩一首

矩字仲方吉水人洪武中官中牟知縣遷台州

府同知謫戍廬陵用薦為廬陵訓導

題宋徽宗雙燕

江南簾幕重重雨艮岳湖山處處花  
兩地舊巢傾覆盡西風萬里入誰家

練高一首

高字伯上新淦人洪武中知起居注以直言忤

旨出為廣德州同知歷臨汀鎮安二府通判王子充云

伯上詩溫厚而豐麗大江以西能繼范德機虞伯生揭曼碩而起者

送趙將軍

崆峒一劔倚秋陰誰識將軍百戰心  
老去功名餘白髮閒來歌舞散黃金  
呼鷹大澤風竿勁射虎南山雪羽深



敲缺唾壺銀燭短時人不解隴頭吟

陳汝言九首

汝言字惟允吳縣人明初官濟南經歷坐法死

有秋水軒臺嚴蓀友云惟允精於山水詩如秋水  
濃於酒山雲白似衣詩中亦有画也

詩話吳縣二陳居船場巷竝有雋才俱善詩工画山水又皆多鬚故有  
大髯小髯之目張氏據吳日惟寅隱居不出惟允為參軍頗親信用事  
南濠都少卿譚纂載洪武初王叔明為泰安知州聽事後有樓三間正  
對泰山叔明寫為圖張絹素於壁每興至輒一舉筆凡三年而圖成時  
惟允為濟南經歷一日胥會值大雪叔明欲改雪景惟允曰如傅色何  
沉思良久曰得之矣為小弓夾粉筆張滿彈之粉落絹上儼然飛舞之  
勢相顧以為神奇叔明就題其上曰岱宗密雪圖因以贈惟允云後惟  
允坐法當死臨刑猶從容作画畢乃就戮張司丞來儀紀以詩云若  
人悟懸解委蛇順天刑忼慨赴東市一日為千齡李公悲上蔡陸子喟  
華亭識機若不豫達生良可經朱絃亦易絕仄景不可停從容灑芳翰  
炳煥若丹青好藝永傳世精魄長歸冥披圖懷平素涕淚緣襟零說者  
以兵解之法推之謂之画解密雪圖陳氏世寶之松江張學使廷采往  
觀坐臥其下兩日徐武功尤愛之後以三十千歸吾鄉姚雲東未幾火  
作此圖遂付煨燼啼矣予嘗見惟允山水真蹟積墨清潤與叔明不相

上下宜當巨兩  
人相契之深也

古詩

皇風去已遠王霸不復論空遺聖經在學者誰能尊物  
情何溷濁干戈相并吞禮樂既不作安使風俗淳撫几  
三歎息哀哉吾道淪

蘭

蘭生深山中馥馥吐幽香偶為世人賞移之置高堂雨  
露失天時根株離本鄉雖承愛護力長養非其方冬寒  
霜雪零綠葉恐彫傷何如在林壑時至還自芳

軍中與劉公宣分韻得夜字

日暝川路遙江寒木葉下鳴笳發洲渚偃旆泊清夜肅



日言卷之三  
三  
肅南鴈翔耿耿銀河瀉委身服戎事行役豈云暇孰不  
感所懷當知歲時謝

舟過錢塘有感

錢塘江上水悠悠落日扁舟送客愁雲氣欲含千嶂雨  
潮聲遠帶大江流征帆且復停洲渚晚飯應須上柁樓  
見說西湖載歌舞春風不似舊時遊

送黃尚書之江西

驛路花如霧春江水似苔尚書今日去從者幾時回解  
纜聽潮落張帆趁曉開相思南浦上明月滿蘇臺

題靈巖寺

靈巖之山山木稠山僧結菴居上頭蒼松風裏作龍吼

白雲窗前如水流憑闌始悲人世迫舉目更感江山秋  
千年霸業俱陳跡落日寒煙生客愁

送謝從義知杭州分題岳王墳

荒墳秋樹影蕭蕭只有孤僧伴寂寥二帝游魂歸不得  
百年枯骨恨難消山空永夜愁寒雨江闊悲風起暮潮  
若到錢塘逢故老傷心切莫問前朝

雜詠

空庭清晝永花落見春暮誰念未歸人草色江南路  
歸來

春城踏踏馬蹄輕醉裏歸來鼓二更月滿青樓人不寐  
政將新曲按銀箏



陳輔一首

輔字里未詳仕為推官詩附見滎陽外史集

出郊

雨歇山晴鶯亂飛水清沙暖日暉暉竹籬綠路酒帘出  
野樹漲陰梅子肥千里鄉心隨夢遠一春樂事與人違  
年華過眼慙無補零落青衫尚未歸

王蒙 三首

蒙字叔明吳興人自稱黃鶴山樵元末官理問

洪武初為泰安知州

洪武乙丑九月十日卒於秋官獄考清

教錄僧知聰招云十二年正月往胡丞相府見王叔明郭傳華克勤在彼喫茶看画則知叔明坐罪亦以胡黨也詩話倪元鎮詩画最自矜重不輕許人獨題叔明画云筆精墨妙王右軍澄懷卧游宗少文叔明絕力能扛鼎五百年來無此君其誠服若此

閒適

高青丘云叔明為趙文敏外孫而其画法自立門戶別具一種姿態與文敏無一筆相似其筆格不下文敏宜矣蓋文敏書画詩皆尚工緻而叔明意在活脫所寫溪山林木或有柯無葉画家謂之不了樹惟詩亦然往往不費推敲而有自然之致乃知善得師者不在循行矩步也

綠楊堪繫五湖舟袖拂東風上小樓晴樹遠浮青嶂出  
春江曉帶白雲流古今我愛陶元亮鄉里人稱馬少游  
不負平生一杯酒相逢花下醉時休

過姑蘇

山圍平野綠煙中江葦蕭蕭兩岸風誰種闔閭城外柳  
年年飛絮入吳宮

陳惟允荆溪圖

太湖西畔樹離離故國溪山入夢思遼鶴未歸人世換



歲時誰祭斬蛟祠

劉秩一首

秩字伯序豐城人洪武中知崇明州有秋南集

李時遠云伯序古體高古近體秀麗詩話伯序詩亦整鍊如芙蓉隔浦聽秋雨楊柳長亭看晚潮沙浦寒霜肥紫蟹野園秋雨熟黃瓜棟花落處風飄樹魚子生時水滿田林下一篷冬聽雪樓中半榻日看山亦琅然可誦也

雞鳴曲

馬初嘶雞初鳴夜待旦晝兼程昨日晚出長安城今日早望橋山行東西相去四百里明日山北還晨征不緣薄宦苦相縈何得如此勞吾生君不見路無窮人易老離家不如在家好吾家萬里在江南回首天涯歸不早

吳植一首

植字子立嚴州人以處士徵授藤州知州

寄張國錄孟兼

昔別意何長重來歲華改沉憂誰與娛懷人邈江海褰衣涉汀洲秋風被蘭茝日夕零露繁芳馨為誰采嘉會諒難并良辰詎容待思君如明月夜夜望光彩

史遷三首

遷字良臣金壇人洪武中用辟召除蒲城知縣

遷知忻州復知廉州良臣追和元遺山樂府三百餘篇楊君謙錄其詩文入大明文寶今

問之鄉人不能舉其姓氏矣

漫興三首



貧居村塢長無事誰復能過野老家只有春風太情重  
小桃深巷也開花

灤東煙樹杜陵家百尺深潭似浣花布袖龍鍾筇竹杖  
也勝裘馬在天涯

暮春

綠陰窗下春草碧無數柳花吹近牀一雙蝴蝶總無賴  
飛到小闌還過牆

張率一首

率字孟循廣信人吳元年徵知嘉定州有張嘉定集

答周檢校

衡茅晚計卜溪南水石幽期得縱探詩社往來青玉案  
仙經借送紫泥函漁村過雨行秋霽龍洞開雲坐晚嵐  
種樹書成嗟已老煩君多致洞庭柑

吳文泰 五首

文泰字文度吳縣人洪武中涿州同知有愚菴集

詩話文度與同郡丁遜敏學專事苦吟嘗閉戶共為詩人見其終日突  
無煙往視之方瞳目相對忘其未食也評者謂其詩僻蹇似孟郊今觀  
其集頗淺易不煩冥索乃爾

有懷義興崔同仁

日嫋嫋兮涼風山中人兮何所蘿軒兮夜月薜牆兮秋  
雨丹桂發兮巖阿荷花落兮江渚我思君兮不來望南



山子延佇

楚江清曉圖

曠曠曙光啓湛湛楓江白河漢縱復橫分明見秋色天  
空爽氣清露濕千峰碧微茫雲夢渚迢遞潯陽宅五柳  
高且疎涼風正蕭瑟孤鶴橫江來扁舟正攜客

送何子方還吳中兼簡一二同志

城頭烏啼朝日黃城門送客歸故鄉邊風吹沙道路長  
南登鴈門踰太行顧我垂老不得將蕭颯短髮垂秋霜  
爲君此別淚霑裳歸心遠逐浮雲翔吳山崢嶸牛斗旁  
五湖浩蕩煙波蒼故園桑梓連崇岡萬里愁思何茫茫  
君家田園亦不荒歸來此樂殊未央兒女歡笑羅酒漿  
遠行辛苦憂俱忘故人若逢滕與梁爲言思君愁斷腸  
勸君莫辭酒滿觴來宵見月遙相望

送人之巴蜀

煙波迢遞古荊州君去應爲萬里遊倚櫂遙看湘浦月  
聽猿初泊渚宮秋雲開巫峽千峰出路轉巴江一字流  
若見東風楊柳色便乘春水泛歸舟

酬陳孟敷見寄

南浦蘼蕪生綠煙憶從分袂是何年歸來還對山中月  
老去惟耕隴上田幾樹蟬聲涼雨後一川霞采夕陽邊  
思君東望堪乘興潮落晴江好放船

鄭潛一首



潛字彥昭歙人元季泉州路總管洪武初以故  
官起除授寶應縣主簿遷潞州同知有白沙橐

樗菴集

程以文云彥昭詩駸駸乎  
格高律熟而入於精者

玄石行為貢尚書賦

尚書階前有玄石流落江湖舊曾識當時重者惜餘貲  
今日移來乃神力初看尚爾混泥沙熟視灑然供拂拭  
黑雲風斷涌峨嶂紫氣霞開見靈壁終朝靜坐無磷緇  
扣之則應聲相隨梅花點點上烏几柳絮緜緜縈硯池  
湘沙驚落孤鴈驚東海躍出生蛟螭千年誰鑿渾沌竅  
半夜誤擊珊瑚枝人生遇合還如是尚書感慨親留記  
姱容麗質豈高人錯節盤根知利器坡仙空作仇池夢

愚翁信遂移山志為公歌此玄石行颯颯霜風度寒翠

朱模一首

模字子範休寧人元季六安州判官洪武三年

為賊所害有白沙行橐

張伯雨云朱子範  
詩有虞揭遺響

送張總管赴鄱陽

近聞使節向鄱陽已報前軍到武昌好過黃州問蘇仲  
曾遊赤壁訪周郎一時人物皆陳迹三國英雄此戰場  
舉酒煩君酌江月匡廬秋色晚蒼蒼

梅頤二首

頤字昌年永嘉人以明經薦除都昌主簿遷夔  
州判官



夏日

松下桃笙酒半醒  
石根流水碧泠泠  
片雲將雨窗前過  
分得新涼入研屏

秋日

黃葉蕭蕭獨掩關  
屏風小幅盡江山  
酒醒夢入湘雲去  
不管秋聲在樹間

烏斯道七首

斯道字繼善慈谿人明初以薦起知石龍縣調

永新以疾去官有秋吟橐春草齋集

張惟靜云繼善詩興寄高遠瀟

灑出塵一掃元人過巧之弊

詩話繼善與兄本良性善竝著才名鄉人目性善為春風先生繼善為春草先生宋學士濂稱其文云俊潔如明月珠洵湧如春江清楊布政

子器稱其詩云疎秀若雨後春山綺麗若雲中翠巘矜許至矣戴叔能贈詩云達士不羈世投身向寬閒又云不有同心人誰其慰枯槁知非營營名利者也句如四顧闐無人一鳥空中鳴江水豈吾限可以相往還朝陽煦游條晴風送飛翼寂焉千載事傷此百年身落日近崦嵫於何從遠道鶴鳴子不和徒然有哀音具饒清氣其言曰詩之作非得夫天地之精氣者不能也信然哉

馬食粟

馬食粟一閑二百匹一食一百斛去年大旱人苦飢  
草根食盡食木皮官司徵粟喂官馬馬何貴重人何微  
人心不敢怨只願官馬肥官馬肥走若飛江南江北正格  
鬪將軍殺賊要馬騎

題寒林遠岫圖

游子念故山歲晏不得歸  
出門見林薄日暮煙火微  
關河渺千里猿狖聲正悲  
况爾霜雪繁鳥道不可躋  
陽春



固伊邇奈此寒無衣衣寒何足歎所憂美人違

邀友人胡舜咨姚晉道劉庸道北郊夜坐

美人集江郊員月湛秋夕天闊星宿繁地迴雞犬寂供  
具雖不殷各取意所適抽辭託厄匹燕坐更几席既盡  
遐邇懷復有新故益涼風激庭柯澄波照林石零露不  
作寒層霄愈凝碧緬思江海內軒蓋相馳激酬酢過為  
懽友道諒匪得

澤畔

上征天無風遠游橐無金種蘭蘭不芳行吟向江潯漁  
父曠達者庶幾知我心鶴鳴子不和徒然有哀音踟躕  
當奈何湘水清且深

陳卧子  
云古拙

過西山訪章願學鍾聲伯二隱者兼與同遊諸公

分韻得深字

冬雨久不作冰霜謝窮陰予因積遐思於焉事追尋西  
山數君子幽居託雲林岡巒負城郭在樂不在深旨酒  
馨良覲嘉言諧素心巖花照紋楸松風隨鳴琴詎謂兵  
革餘得以疏煩襟人生易彫謝何時續斯今離別奚足  
歎願言懷德音

雜言

荆棘開好花娟娟耀芳春羅生及周道未嘗罹斧斤斧  
斤或相加芒刺反傷人朔雪貸其死后土固其根人力  
媿孱弱天地胡不仁崇岡有松柏日夕摧為薪



次韻酬范運中

讀書窗前煙草深三年獨守荒山陰出門駕輿輿脫輻  
閉戶燒鉛鉛不金唾壺擊出慷慨意青燈照見平生心  
故人苦道不相見寄詩復欲招我吟

馮伯初 一首

伯初字正始嘉興人洪武初官府同知

崔貞姑廟

貞姑遺廟練塘坳古瓦漂零補白茅影帳有煙香細細  
明妝剩粉玉硯硯連村未輟雞豚社獨樹長懸鸛鶴巢  
右族博陵銷歇盡尚餘彤史一題鈔

詩話郡丞子妻馮孺人遠祖也馮氏族譜載其詩三十餘首予少日僅錄其一今予外弟金滢無後譜不復可得矣貞姑廟在練浦塘一螺清

東南廟外有橋土人以貞姑為土穀祠春秋社祭府志失載陳處士靈茂詩雲衣金粉蝕煙帳蕙蘭銷亦過廟下作也有好事者補張堯同百

詠則廟其一乎

陳伯康 一首

伯康字仲進長樂人江山知縣有南雅集

寄邳縣喻知縣

寄語邳州長何時過洛中相看兩舍許不得一尊同客  
思瞻秋月鄉書遲早鴻覃懷臨別處每憾太怱怱

莘野 一首

野字叔耕歸安人洪武初由本縣儒學訓導遷  
棗強知縣致仕後改麗波巡檢卒官有環洲集  
春日登城有感



憑高獨立午風輕望入平湖眼更明白鳥影邊陽羨樹  
青山堆外闔閭城樓臺霽色千家日楊柳春聲幾處鶯  
滿眼故人零落盡野花芳草不勝情

林子森 一首

子森温州平陽人舉秀才為臨洮府經歷

鎮遠道中

行盡荒林晚未休鷓鴣聲斷碧山秋逢人數問前程路  
九十長亭是貴州

俞貞木 二首

貞木初名楨以字行更字有立吳縣人洪武初

以薦知樂昌縣改都昌

一云南安府南康縣

有集

都昌罷官家居郡守

姚善延以訓子以鄰人事連坐逮詣京師卒建文三年七月也劉鳳謂勸姚守起兵為衛尉執送死之誤矣詩話明府有雕本集二冊子嘗見之於里中王山人翎書齋山人頗稱其詩而今訪之藏書家遂不復得又有日錄亦無存當日若金侍郎問陳簡討繼皆其弟子也

題王子孟端山水

喬木靄春霽野水浸平沙山脊浮雲合巖腰細路斜攜  
琴向江寺沽酒到漁家歸去幽居晚山童掃落花

題趙仲穆畫馬

房星方墮墨池中飛出蒲梢八尺龍想像開元張太僕  
朝回騎過午門東

王澤 五首

澤字叔潤天台人僑居山陰洪武中官華亭縣



丞有青霞集

徐子元云青霞天厨之珍自然適口  
全室泐公有送王叔潤詩云平涼來又去官滿復

之官則叔潤任平涼之

華亭非松江華亭也

詩話叔潤詩音聲

嘹亮亦是作家

寄友人

我本東海人家住東海頭自從北角時便向西州遊  
邇來西遊十九載夜夜思歸夢東海此身厭逐戎馬間  
落魄魄惟存壯心在今年始欲向東還便將歸老天台山相  
隨仙人養雞犬笑弄綠水桃花間况聞溪上桃已熟仙  
女嬋娟面如玉春風縮髻雙綠鬟舞腰解按山薌曲去  
年羣仙遙見招謂予自是王子喬山中何嘗識酒禁日  
日爛醉吹璫簫昨日纔經四明道故人相見驚絕倒間

關萬死得生還顏色還同舊時好忽聞天吳落海隅到  
海要拾明月珠大風三日撼天黑海底吹折紅珊瑚洪  
濤如山老蛟怒白日江泉塞煙霧仙山咫尺不得歸目  
送冥冥塞鴻去櫂舟惆悵却西回側望仙山心欲摧空  
懷帝子芙蓉闕遙望中天兩玉臺愁來昏昏枕書睡呼  
酒狂歌不成醉丈夫出處真可憐往往長遭不如意作  
詩為謝丹霞仙金堂石室無清緣有心未罷歸來約更  
待秋風海月圓

是時方谷真據温台  
叔潤阻兵不得歸故作是詩

姑蘇感事

天星夜落水犀軍又見吳宮走鹿羣睥睨金湯徒自固  
愴惶玉石竟俱焚將軍只合田橫死國士寧無豫讓存



風雨明年寒食節麥盃誰上太妃墳

徽宗画餅中桂花

玉色官餅出內家天香誰貯月中花六宮只愛新涼好  
不道金風卷翠華

小游仙

中山千日酒初醒却愛玄都夜景清起坐天門吹玉笛  
月中珠樹起秋聲

竹宮青鳥

阿母瑤池信不通茂陵松柏老秋風野垣春雨叢篁綠  
青鳥猶來認故宮

程煜一首

煜字彥明揚州人寶坻縣丞

題明皇竝笛圖

華清宴罷卷霓裳重立東風竝海棠鳳琯莫吹新製曲  
有人乘月倚宮牆

陳玄一首

玄字東莞人洪武辛亥進士官縣丞

資福寺

聽經後去已多時梧竹風標入夢思暗粉尚留多寶塢  
長廊空見捨田碑石池雨過添新水老柏年深換舊枝  
聞道靈源高閣上至今人誦小山詩

吳斌一首



斌字蘊中休寧人洪武中用薦授平陽縣主簿  
有韞玉山房集

量田謠

朝量水田雪暮量山田月青山白水人如雲朝暮量田  
幾時歇尺田寸地須盡量絲毫增入毋留藏時暘時雨  
欣時康我民欲報心未央年年增賦輸太倉安得長風  
天外起吹倒崑崙填海水更出桑田千萬里

醉歌行

登高取醉散我愁倒卧城南百尺之酒樓出門但知行  
路苦醉鄉可以逍遙遊君不能遺身天地玉京又不  
能營名將相專金城徒將綠髮染春雪風塵羈絆終無

成不如且飲一壺酒酒盡愁消更何有

汪禹又云章短氣長  
學太白神似太白

戴奎一首

奎字文祥台州人洪武中齊河縣主簿有介軒  
集

秋夜有懷

欲憑詩句寄秋風吟到宵分蜜炬終月色如銀庭樹冷  
一絲和露墮青蟲

詩話風定小軒無落葉青蟲相對吐秋絲秦  
淮海句也文祥移入夜景可謂青出於藍

葉子奇二首

子奇字世傑龍泉人用薦主巴陵簿

詩話世傑坐事繫獄於獄中撰草木子又有餘錄  
紀元季明初事頗詳可資國史采擇詩特餘技爾



岳陽晚興 二首

洞庭萬頃秋月君山一點晚煙安得幅巾無事酒船吹  
笛江天

暮雨漁村春暝曉霜楓葉秋酣人世花開花落山光湖  
北湖南

金 慎 一首

慎字子肅嘉興人洪武初貢士官典史

柿林新居

喜得移家秀水濱此邦風物舊相親為農久已知農事  
近市還能遠市塵鵝散墨池迎洗硯鷗當漁屋看垂綸  
蔬畦藥圃終吾老未必溪花解笑人

詩話柿林今之新城鎮也去嘉興府治西北三十里而近城本作勝宋  
曾魯公嘗監秀州新厓酒稅金尉一詩格調雖卑然微官能詩足以見  
當時文教之盛

薛 敬 一首

敬字原理鄞縣人洪武初舉茂才授龍泉稅大  
使歷國子監博士有江天集

與范宣之何約之重游隱學寺

薄言山寺去兩度出東郊湖草添新漲山禽改舊巢煙  
霞野衲路鹿豕故人文鐘磬雲深處來聽幾度敲

任 原 二首

原字本初休寧人明初以捍禦功授顯武將軍  
雄鋒翼管萬戶有集



詩話本初雖歷戎行實為環谷東山談經弟子其詩互刊  
唐仲實白雲集中今從燉煌程氏新安文獻志定為任作

見鄉人程大

少年策馬辭鄉邑落魄天涯幾秋色鳳池昨遇故鄉人  
不道姓名應不識布衣拂却長安塵相看感歎念情親  
青春作客無遠近白髮從軍多苦辛以茲失路誰相顧  
我向東流子南去歸夢不離滄海雲邊愁遠挂青楓樹  
楓樹叢林隔海天百年聚散一茫然簪纓故舊應誰在  
萍梗江湖祇自憐臨岐執袂須傾倒明朝又別關山道  
心隨征鴈向斜陽愁對離憂醉芳草

贈同舟從軍林生

青天無盡碧波長百尺雲帆挂夕陽海路音書何處寄

西風吹鴈不成行

明詩綜卷十三







